

Peqqussutissatut siunnersuummut oqaaseqaatit

Oqaaseqaatit nalinginnaasut1. Aallaqqaasiut:

Aalisarnikkut, piniarnikkut nunalerinikkullu inuussutissarsiortunut inuussutissarsiutinut tapersiisarneq pillugu malittarisassat atuuttut aalisarnermut, piniarnermut nunalerinermullu tapersiisarneq pillugu Inatsisartut peqqussutaat nr. 10, 12. november 2001-imeersumi aalajangersagaapput. Aalisarnermik, piniarnermik nunalerinermillu inuussutissarsiutillit inuussutissarsiorterannik siuarsaaneq pillugu Inatsisartut peqqussutissaattut siunnersuutip uuma siunertaraa qulaani pineqartoq taarserpaa. Tamakkununga tunngasuni inatsisit nutarterneqarnissaannik kissaateqarnermut arlallit pissutaapput.

Siunnersuummi anguniagaasut pingaarnerit makkuupput: Peqqussutip nalunaarutillu nutarternissaat ullutsinnullu naleqqussarnissaat, immikkuualuttut nalunaarummut nuunneratigut eqaallisaanissaq, taarsigassarseriaatsip nutarternissaa pisariinnerulersinnissaalu, pisussaaffimmik sumiginnaasimanermi periarfissat ikilisarnissaat, Inatsisartut inatsisaata imarisaata pisariillisarnissaa, inatsisartut inatsisaata paasiuminartunngortinnissaa atoruminartunngortinnissaalu.

2. Siunnersuutip immikkoortuinut pingaarnernut nassuiaatit:

Inuussutissarsiutinut aalisarnermut, piniarnermut nunalerinermullu ukiorpassuarni assigiinngitsunik ikiorseeriaaseqartoqarsimavoq. Ullumikkut Kalaallit Nunaat aalisarnermi suliffissuaqarfissuuvoq annertuumik imminut napatittumik taamaattumillu qangatut ikiorserneqarnissamik pisariaqartitsiviunngitsumik. Siunnersuummi siunertaavoq piniarnermi, nunalerinermi aalisarnerninilu ajornaannerusuni inuussutissarsiutitigut ikiorserneqarnissamik periarfissiinissaq, minnerunngitsumik piffiit inuussutissarsiutit taaneqartut avataatigut suliffissaqarfiunngitsut eqqarsaatigalugit. Peqqussutissatut siunnersuummi siunniunneqarpoq tamanna pissasoq inuussutissarsiutini tapiissuteqarfigisaasuni naammassisaqarluarsinnaaneq akilersinnaassuserlu tunngavigiuarlugit.

Peqqussutissatut siunnersuutip siunertaatut nutaatut taamaalilluni imminut nammassinnaasumik inuussutissarsiutitigut ataatsimut isigalugu ineriartortitsinissaq pingaartinneqarneruvoq, taamaattoq suliffissaqartitsiuaruarnissap pitsaangorsaaviginissaa suli salliutinneqarluni. Inuussutissarsiummut tapiinerup aallaavia isigalugu unammillernermut innarlarsaataasussaavoq, taamalu inuussutissarsiorteranut naammassisaqarfiullartumut unammillerluarsinnaasumullu paarlangassalluni. Peqqussuummi siunnersuutikkut inuussutissarsiorneq naammassisaqarfiullarlunilu unammillerluarsinnaasoq ungasinnerusoq isigalugu suliffissaqartitsiniarnermut attuumassuserneqarpat kissaatigineqarpoq

suliassaqartitsiniarnikkut ungasinnerusooq isigalugu sunniutaasooq ima ittoq anguneqassasooq inuussutissarsiorneq tapiissutitigut tunniussatigut innarlernerqarsimassanani. Taamaalilluni kissaataavooq tapiineq taamaallaat suliniutinik aallartisaatit atuatissasooq kingornalu imminut ingerlatilerneranik kinguneqarluni.

Ataatsimut isigalugu siunnersuummi siunniussaavooq tapiissutit tamakkiisumik atorneqarnissaat. Tassalu tamakkua tunngavigalugit anguniarlugillu siunnersuut manna saqqummiunneqarpoq.

Kissaatigineqarpoq peqqussut eqaannerussasooq aalisarnikkut politikkip suuneranut naapertuuttumik atorneqarsinnaanissaa, pingaartumik aalisarnermut akuersissutit pisassiissutillu tungaasigut. Maanna peqqussutit atuuttup immikkoqqissaaq imarai qaleralinniarnermut saattuarniarnermullu tapiissutit. Aalajangersakkat taakku peerneqarnissaat siunnersuutaavooq, aalisarnerullu qanoq ittuunissaa nalunaarummut ilanngunneqarsinnaalerluni. Kiisalu kissaataavooq malittarisassat immikkuullarinnerusut allat nalunaarummut nuunneqarnissaat.

Peqqussummi atuuttumi atorneqarput taarsigassarsiat ernialersukkat, taarsigassarsiat ernia-lersugaanatillu akilersugassartaqanngitsut nammineq akileeqaataassutinik ilallit. Allaffissornikkut aqutsineq oqilisarumallugu kissaatigineqarpoq taarsigassarsiat tamakkua taarsigassarsisiteriaatsimik nutaamik taarserneqarnissaat nammineq aningaasaleeqataassutinik ilallugu. Taarsigassarsisiteriaaseq siunnersuummi § 22-mi sukumiinerusumik allaaserineqarpoq.

Taarsigassarsisup taarsigassarsiaminik ikiliartortitsinera ilutigalugu siunnersuutaavooq Naalakkersuisut ikiliartortitsinermut peqataasinnaanissaat. Tassalu taarsigassarsiat akilikkanit annerusumik ikiliartortinneqassapput tassaniipporlu tapiissuteqarnivik. Taarsigassarsisup akileeqaataassut aatsaat pisinnaavaa taarsigassarsiani akilersorunigit. Naatsorsuutigineqarpoq tamatumuunakkut taarsigassarsioq isumaqatigiissut malillugu akilersuinissaminut kajuminnerulissasooq. Taarsigassarsiap aqqa taamalu peqqussutit aqqa allanngortinneqarpoq tassaajunnaarsillugu "tapersiisarneq" tassaalersilluguli "inuussutissarsiutinik siuarsaaneq", erseqqissarumallugu pineqarmat taarsigassarsiguit akileeqaataassaattitaaq. Tassalu taaguut nutaaq tassaalerpoq "inuussutissarsiutit siuarsarniarlugit taarsigassarsisitsisarneq".

Peqqussummi atuuttumi taarsigassarsinermi siunertanut ataasiakkaanut procentinngorlugi akiligassiisoqartarpoq taarsigassarsiat erniaqaratillu akilersugassaannngitsut qanoq annertuti-gissanersut, taarsigassarsiat ernialersukkat qanoq annertutigissanersut namminerlu aki-leeqaataassutit qanoq annertutigissanersut. Taanna siunnersuutigineqarpoq allanngortinneqassasooq taarsigassarsianut akileeqaataassutit peqqussut nutaaq atorlugu nalunaarummi aalajangerneqartassallutik.

Pisussaaffinnik suusupajuginnittoqarsimatillugu Naalakkersuisut iliuuseqarnissaat annikillisarneqarput. Taamaaliorpoq nassuerutigisariaqarmat ikiorsiisarneq marloqiusaasooq, illuatungaatigut inuussutissarsiummut ingerlakkumasamut

taarsigassarsisitsisoqartarpoq, illuatungaaticgullu taarsigassarsiat utertillugit akilersorneqassallutik. Taarsigassarsinermit piunasaqaataasuni iluanaarnartuneereerpoq tapiiffigineqarneq, taamaattumillu tunngaviusariaqarpoq taarsigassarsisoq taarsigassarsinermit isumaqatigiissut naapertorlugu utertillugit akilersuisinnaassamat. Aallaavik tamanna naapertuutinngilaq maannakkut peqqussutaasup akiligassanik akiliisitsinngikkallarnermut, isumakkeerinermit il.il. annertuumik periarfissaqartitsineranut, taamaattumillu siunnersuutigineqarpoq akiliisitsinngikkallartarnermut periarfissat qumartiterneqassasut, tak. § 25-mut tamanna pillugu oqaaseqaatit.

Kiisalu kissaatigineqarpoq peqqussutip paasilertoruminarnerullunilu atoruminarnerunissaa, ilaatigut iliuusaasinnaasut pissutsinilu immikkut ittuni malittarisassat ikilisarnerisigut.

Aalajangersakkat peqqussummi atuuttumiit atorunnaartussatut siunnersuutigineqartut pillugit ilaatigut makkua taaneqarsinnaapputaaq:

Eqquutsitsinngitsoornermi pillaaammik ernialiisinnaatitaanerup ingerlateqqinneqannginnissaa siunnersuutigineqarpoq. Tamanna pivooq paasinarsimmat taarsigassarsisup akiliisinnaassusianut akileerusussusianullu sunniuteqanngitsoq. Peqqussummi anguniakkamut naapertuutinngilartaaq taarsigassarsisut akiliisinnaanngitsut akiliiumanngitsulluunniit annertuumik 10%-imik pillaaammik ernianut akiliisittarnerat. Siunnersuummi siunniunneqarpoq akiligassat ukiut marluk angullugit kinguartikkallarsinnaanissaat, pissutsini immikkut illuinnartuni sivisunerusumik. Taarsigassarsinermit isumaqatigiissut suli eqqortinneqarsinnaanngippat, taava tamatuma kingornatigut periarfissatuaalissaaq taarsigassarsiaqartitsinerup taamaatitinneqarnissaa qularnaveeqqusiussaqaarsimappallu qularnaveeqqutip tiguneqarnissaa tuniniarneqarnissaa siunertaralugu.

Peqqussutip massakkut atuuttup §§ 3 aamma 4, angallatinut nutaanut atornikunullu pisinissamut taarsigassarsisitsisoqarsinnaanera siunnersuummi ingerlateqqinneqanngitsoq siunnersuutigineqarpoq. Tamanna peqquteqarpoq Aalisarnermut aningaasaliissutinut immikkoortitat pillugit Inatsisartut inatsisissaanni malittarisassiuunneqassasut. Aalisarnermut aningaasaliissutinut immikkoortitat pillugit Inatsisartut inatsisissattut siunnersuut Inatsisartut ukiakkut 2006-imi ataatsimiinneranni oqaluuserineqassaaq.

Massakkut peqqussummi atuuttumi umiatsiaaqanut tapiissutisitsisarnerit pillugit aalaja-ngersagaq § 6, imm. 7-imiittoq sumiiffinnut immikkoortiterinermit tunngasooq atorunnaarsinneqarpoq, tassa siunniunneqarmat nalunaarutikkut eqaannerusumik aqunneqarsinnaanissaat.

Peqqussummi atuuttumi savaateqarfinnut nutaanut taarsigassarsisoqarsinnaannginnera pillugu § 14, imm. 2-mi aalajangersakkap ingerlateqqinneqannginnissaa siunnersuutigineqarpoq. Savaateqarfinnik nutaanik pilersitsinissaq siunniussaangilaq. Aningaasaliissutit annertussusiat anguniakkanilluunniit aalajangersakkat siunnersuummi periarfissiinngillat, tassami

savaateqarfiit pioreersut akilersinnaasumik ingerlatsinissaq
ajornartorsiutigereermassuk. Taamaattumik aalajangersagaq pisariaqanngilaq.

Taarsigassarsiniartarfinni allani erniatigut tapiiffigineqarsinnaanermik periarfissaq
siunnersuummi ingerlateqqinniarneqanngilaq.

Angallatit atorunnaarsinneqarneranni tapiissutit, akiitsut isumakkiigaaneri,
akiliinngikkallartarnissat il.il. pillugit aalajangersakkat atorunnaarsinneqarnissaat
siunnersuutaavoq, isumaqartoqarmat aqqissuussinerit taamaattut inatsisinut allanut
ilanngukkaanni pitsaanerussasoq.

3. Pisortanut aningaasatigut allaffissornikkullu kinguneri:

Pisortanut aningaasatigut allaffissornikkullu kinguneri allannguuteqassanngillat,
aningaasat atorneqartussatut akuersissutigineqartut killiussat siornatigornit
allannguuteqassanngimmata, taamaattoq atoqqittussaajunnaarsitsinermut
aningaasaliisoqaqqissinnaanngilaq. Allannguutissatut siunnersuut massakkut
inatsisinut atuuttunut allaffissornikkut oqilisaasoqarnissaanik kinguneqarsinnaavoq.
Allaffissornerup oqilisarnissaa pinerullugu ingerlatsinermut akiligassarsineq
atulersinneqarpoq qinnuteqaatit annikitsualukkuutaat isummerfigineqassaassallutik
ingerlatsinermi akiitsutigut aningaasaliiffigineqarsinnaanngorlugit.
Aningaaserivinnut atorniarnernut/atugassalluunniit amerliallatseqqinnerinut
qularnaveeqqusiineq atussanngimmat tamatumunnga pissutaavoq Naalakkersuisut
aningaasat ingerlatsinermut siunertanulluunniit allanut atorneqarsimanerini
nakkutiginninnissaminut periarfissaarukkumanginnerat. Peqqussutit atuuttup §
16, imm.1-ia malillugu taarsigassarsisut arlallit ataatsimut pisiniarnerannut atatillugu
(nerukkaatissanut naatsiiassarsiniarnerannilu) pisiffinnut assartuisunullu
utaqqiisaasumik Naalakkersuisut akiliinissamut qularnaveeqqusiisinaapput.
Periaaseq taanna ingerlatsinermut akiligassarsinermi ulluinnarni atorneqalissasoq
siunnersuutigineqarpoq. Inuussutissarsiutit siuarsarnerannut atatillugu
taarsigassarsiniarlutik tapiiffigeqqullutilluunniit qinnuteqartut amerliartulernissaat
naatsorsuutigineqanngilaq.

4. Inuussutissarsiortunut aningaasatigut allaffissornikkullu kinguneri:

Siunnersuut nalilerneqarpoq inuussutissarsiortunut aningaasatigut allaffissornikkullu
kingu-neqassanngitsoq. Taarsigassarsinerit ilaasa akilersornissaannut
piffissarititaasoq sivikilliiallappoq, taamaallaallu nunalerinermut atatillugu
iluarsaassinerit pingaaruteqavissut ani-ngaasaliiffigineqarsinnaapput. Kiisalu
pisiffinnut assartuisunullu akiliinissamut utaqqiisaasumik qularnaveeqqusiineq
periarfissaajunnaarpoq. Taakkununga taarsiullugu ingerlatsinermut akiligassarsineq
aqqutissanngorpoq. Taama allannguuteqartitsineq naatsorsuutigineqanngilaq
nunalerinernut ataasiakkaanut ajoqutaassasoq.

5. Avatangiisinut pinngortitamullu kinguneri:

Peqqussutissatut siunnersuut nalilerneqarpoq avatangiisinut pinngortitamullu
kinguneqassanngitsoq.

6. Innuttaasunut allaffissornikkut kinguneri:

Siunnersuut nalilerneqarpoq innuttaasunut allaffissornikkut kinguneqassanngitsoq.

7. Naalagaaffeqatigiinnermut namminersulernissamullu attaveqarneq:

Siunnersuut nalilerneqarpoq naalagaaffeqatigiinnermut namminersulernissamullu kingu-neqassanngitsoq.

8. Pisortanik kattuffinnillu il.il. tusarniaaneq:

Aalisarnermik, piniarnermik nunalerinermillu inuussutissarsiutillit inuussutissarsiorterannik siuarsaaneq pillugu Inatsisartut peqqussutissaattut siunnersuut ukununga tusarniutigineqarsimavoq: Kalaallit Nunaanni Aalisartut Piniartullu Kattuffiat (KNAPK), Kalaallit Nunaanni Kommuneqarfiit Kattuffiat (KANUKOKA), Savaatillit Peqatigiit Suleqatigiissut (SPS), Nunalerinermut Siunnersuisoqatigiit, Grønlands Arbejdsgiverforening (GA), Nunaqavissut Sulisitsisut Kattuffiat (NUSUKA), Sulinermik Inuussutissarsiuteqartut Kattuffiat (SIK), Godthåb Båd & Glasfiberservice, Maniitsumi Amutsivik A/S, Aningaasaqarnermut Pisortaqaarfik (AP), Inuussutissarsiorterannik Pisortaqaarfik (IP), Akileraartarnermut Pisortaqaarfik (AKP) aamma Avatangiisinut Pinngortitamullu Pisortaqaarfik (APP).

Tusarniaavigisat tamarmiisut akissuteqarput uku kisimik pinnatik: Savaatillit Peqatigiit Suleqatigiissut (SPS), Nunalerinermut siunnersuisoqatigiit, Godthåb Båd & Glasfiberservice aamma Maniitsoq Amutsivik A/S.

Pisortaqaarfiup tusarniaavigisat akissutaannut oqaaseqaatini akissutit naggataasigut naqinnernik uingasunik ilannguttarpai.

APP-ip uparuaatigaa APP-ip Aalisarnermut, Piniarnermut Nunalerinermullu Pisortaqaarfillu (APNP) peqatigiillutik piniarnermik inuussutissarsiorterannik inooqatigiinni aningaasarsiorterannik misissueriaatsimik aallaaveqarlutik misissueqqissaarsimallutik. Misissueqqissaarnermi aqutsisoqatigiinnik pilersitsisoqarsimavoq innersuussutissanik suliarinnittussamik. APP isumaqarpoq piniarnermik inuussutissarsiorterannik siuarsaavigineqarnissaanut peqqussusiakkut siunnersuutigineqartussat utaqqimaarunneqarsinnaasut Aqutsinermut ataatsimooqatigiit siunissamut innersuussutissaat takutserlugit minnerunngitsumillu ineriartortitsinissamut tapiisarnissat eqqarsaatigalugit. *APNP isumaqarpoq siunnersuutikkut § 31-kkut Naalakkarsuisut periarfissinneqartut malittarisassiuussinissamut aqutsinermut ataatsimooqatigiit inooqatigiinni aningaasarsiorterannik innersuussutaat naapinniarneqarsinnaallutik.*

IP-ip aamma AP-ip malugeqqaat peqqussutissamik siunnersuusiakkut maannamut ilusiliineq qanoq iliuuseqarfigineqanngimmat Namminersornerullutik Oqartussat aningaaserivittut suli ingerlassimmat tassunga atatillugu ikiorsiissutinik tapiissuteqartarneq paasiuminaatsortalerujussuulluni. Ilanngullugu IP-ip AP-illu ajunngissangativippaat Namminersornerullutik Oqartussat periarfissatut isumaliutersuutigissappassuk aningaaseriviit (inuussutissarsiutit siuarsarnissaanut atatillugu) taarsigassarsitsisalernissaat Namminersornerullutik Oqartussallu qularnaveeqqusiisussaaginnarlutik taamalu inuussutissarsiorterannik tapiisarneq piffissaqarfiginiarneruinnalerlugu. Ilanngullugu IP-ip malugeqquaa inuussutissarsiutinik siuarsaanerannik atatillugu nunalerinermut taarsigassarsisarneq WTO-p maleruaqqusaanut naleqqutinngitsutut oqaatigisariaqannginneroq. *APNP-*

up peqqussutissamut siunnersuusiornikkut oqimaaqatigiissinniarsarai soqutigisat marluk imminnut assortuuttut. Siulleg tassa imminut napatissinnaasumik inuussutissarsiuteqalernissaq, aappaatullu inooqatigiinni aningaasarsiornermi sunniutissat millisinnissaat peqqussutissamik siunnersuusiornermi pineqartut maanna inuussutissarsiutigisaminnik inuuniutaarutitineqassappata. Peqqussusiamik siunnersuut isigisariaqarpoq Aalisarnermut aningaasaliissutitut immikkoortitat pillugit Inatsisartut inatsisissaattut siunnersuummut atassuserlugu, tassani pingaarnerutinneqarmat allamiit aningaasaleeqataanissaq.

Aningasaserivinnut qularnaveeqqusiineq illuatungeralugu ingerlatsinermi tiguinnagassanik akiligassarsineq pillugu. APNP-p aalajangiuppaa aningaasaserivinnut qularnaveeqqusiineq matumani aqutissaanngitsoq qularnaallisinneqarsimannngimmat aningaaseriviit nunaleri-nermut ilumut atukkiussisinnaanersut aamma Naalakkersuisut ima inisseqqunagit qularnaveeqqusiussanik ataavartumik akiliualernissaat. Ilanngullugu APNP-p pissutiginiarpaa ingerlatsinermut akiligassarsinikkut atornerluinissaq pinngitsoortinneqassasoq akiligassarsiat ingerlatsinerinnarmut ator neqartussaammata.

WTO nunalerinerlu pillugit. Tamatumani ajornartorsiutaasut APNP-p ilisimaarai. Tassunga atatillugu APNP-p uparuaatigissavaa naatsorsuutigisassat peqqussusiassamut siunnersuummi matumani taaneqartut nunat allarpassuit nunalerinermut politikkianni siumugassaammata aningaasarsiornikkut imminut nammassinnaasumik nunalerineqarsinnaanera ungasinnerusoq isigalugu qulariniannikkaluarlugu.

Peqqussutissamut siunnersuusiap kapitali 2-anut IP-p oqaatigaa inuussutissarsiutinik siuarsaanissamut atatillugu eqqarsaatigisariaqarnersoq taarsigassarsinermut atatillugu erseqqissuliaralugu naliliineqartariaqartassasoq aallaavigalugit inatsisip sullerinnissamik, unammillerluarsinnaassutsimik imminullu napatissinnaasumik inuussutissarsiutitigit ineriartortitsinissamik siunertai. Taamaappat aalajangersagaliortoqarsinnaagaluarpoq isertitassat anisitassallu missingersuusiornissaannik, aningaasatigit akilersinnaasumik ingerlanissamik immikkullu ilisimasallit tamakkuninnga naliliinerannik takussutissanik – soorlu aningaaseriviup aamma atukkiussiitigaluni Namminersornerullutik Oqartussat ilaatigut qularnaveeqqusiissutissaannut tunngasunik. Kissaatiginaraluartoq inuussutissarsiummut 100 %-imik imminut napatittumut ikaarsaariarneq ajornaqaaq pissutsit piviusut ullumikkut tamanna soorlu takutikkaat. Kalaallit Nunaata unammillersinnaanngisai ima angitigaat (assersuutigalugu USA-mi EU-milu inuussutissarsiutit anginerpaat naalagaaffimmit ikiorneqartut), Kalaallit Nunaanni inuussutissarsiutit pingaarnerit tapersorsorneqanngippata tamanna ima kinguneqarsinnaalluni atuisut kalaallit tunisassiaannik pisisinnaajunnaassagaluarlutik akitsorpallaassammata.

Taamaattoq siunnersuummi siunertaavoq inuussutissarsiornermut ingerlalluartumut unammillersinnaasumullu malunnanngingajattumik ikaarsaariartuaartitsinissaq. Tamatuma aamma nassatarissammagu inuiaqatigiinni qajassuarnerpaamik ikaarsaariartitsineq.

IP-ip oqaatigaa pilersaarutip aningaasarsiornikkut imminut akilersinnaaneranut atatillugu pisariaqartinneqartoq oqariartaatsip "ungasinnerusq isigalugu"-p qanoq paasisariaqarneranik erseqqarissaanerunissaq. Imminut akilersinnaasumik ingerlalerneqarneranik tungaanut piffissaq atorineqartoq sivisuallaarpat navianaatilerujussuuvoq suliffiup akiliisinnaajunnaarluni u-ninnissaa taarsigassarsiat sapangillugit Nunattalu Karsia tamaviaartinneqarluni. Iluaquataasussamik oqaaseqaatini itisilerneqarsinnaavoq imminut akilersinnaanissamik piumasarisaq qanoq oqimaatsigissanersooq aamma eqqarsaatigalugu Naalakkersuisut inuussutissarsiutit siuarsarniarlugit taarsigassarsianik ikilisaaqataatinniarneqarnerat. Taamatut iluquataasussaasumik itisilerneqarsinnaagaluarpoq imminut akilersinnaanermik oqarneq kia naliliinerigaa, naliliinermullu piumasarisat suunersut; assersuutigalugu qinnuteqartoq immikkut ilisimasalimmit aningaasarsiornikkut naliliiffigineqarnissamik piumaffigineqarnersooq. § 2-mut oqaaseqaatini oqariartaaseq "ungasinnerusq isigalugu" itisilerneqarpoq. *Aningaasatigut imminut aki-lersinnaassuseq oqimaaloqutserneqassaaq inuussutissarsiutinik siuarsaanermut atatillugu taarsigassarsiat tunniunneqarnerannit akilerneqarsimanissaannik piffissaliussamut naleqqiullugit. APNP-p taamaattoq malugeqquaa imminut akilersinnaassutsip angunissaa sivilisuaajusinnaammat nunarsuup ilaani unammillikkavut maannakkutut tapiiffigineqartigitillugit.*

Peqqussutissatut siunnersuutip § 2, nr. 3-anut atatillugu SIK-p kissaatigaa erseqqissumik nassuiaqqullugu oqarneq "pilersaarusiarnut aningaasartuutissat pissarsiasatut naatsorsuussanut naleqquttutut nalilerneqarsimanissaat". *Naammaginassusia ima issaaq pilersaarut ima pissarsinartigissasoq taarsigassarsinermi isumaqatigiissut isumaqatigiissutigineqarnermisut naammassineqartussaalluni.*

Siunnersuutip § 4-nut atatillugu IP-p itisileqquaa "annerusumik" allannguuteqarneq qanoq paasisariaqarnerooq. *Peqqussutissatut siunnersuutip iluarsaatap § 4-aa allanngortinneqarpoq § 30-mut tassani oqaasertaqalerluni allannguutinik annertuunik. Ilanngullugit takukkit allannguummut § 30, imm 2-mut oqaaseqaatit.*

Siunnersuutip § 8, imm. 2-mut atatillugu SIK-p erseqqissumik nassuiaqquaa aalisartup akunnattumik piginnaassusillip qanoq angusaqartigisinnaassanganeraneqarneq. *Tassunga atatillugu oqaatsit atorineqartut allanngortinneqarput "aalisartup pissusissamisoortumik angusannaavinut". Tamanna isiginninneruvoq agguaqatigiissillugu isertittakkatigut tunngavinnut. Pilersaarutit aningaasatigut ataatsimut isigalugu nalilerneqartarnissaannut atatillugu oqaaseqaatit itisi-lerneqarput, takukkit § 8, imm. 2-mut oqaaseqaatit.*

Siunnersuutip § 5, imm. 1, nr. 1-imut atatillugu KNAPK-p kissaatigaa umiatsiaaraq minnerpaamik 16 annerpaamillu 25 fodsissasoq. *APNP-p aalajangiusimavaa anginerpaaffissaq 19 fodsissariaqartoq umiatsiaararsiniarnissamut aningaasaliissutit killeqarmata sapinngisamillu amerlanerpaat tapiiffigineqartarnissaat kissaataammat.*

§ 6-imut atatillugu KNAPK-p oqaatigaa tapiissutit tunniunneqartassasut siunertanut pingaartumik aalisarnermut piniartuunermullu. *Siunnersuummut allannguutissaq ilanngunneqarpoq.*

Siunnersuutip § 9-anut atatillugu KNAPK-p oqaatigaa inummut ataatsimut ukiut tallimannorneri tamaasa tapiineqartassasooq ukiut aqqaneq-marlungorneriniunngitsoq. *Ukiunik aqqaneq marlunnik toqqaaneq pissuteqarpoq kissaataammat tapiiffigineqartussap umiatsiami aserfallatsaalinissaanik soqutiginninnissaa anguneqassammat umiatsiarlu sillimaserneqarsimassammat. Taamalu maannamut atugaasoq allanngortikkiartuaarneqassaaq ukiut tallimat ingerlareerneranni umiatsiaq nalikillisaaffigineqartaraluarat tamatumalu kingorna nutaamik tapiiffigineqarnissamut periarfissaqaraluarluni. Naalakkersuisut isumaqarput nutaamik tapiissuteqarneq umiatsiaaqqap inuussutissarsiutaanissamut piukkunnassusianut, aserfallakkiartorneranut atatillugu isigineqassasooq umiatsiaaqqap nalikillisaaffigineqarneranut pinnani, taamaalilluni aqqissuussineq sapinngisamik inunnut amerlasuunut nuannaarutaaniassammat. Assersuutigalugu taaneqarsinnaavoq aalisartoq/piniartoq inuutilluni inuussutissarsiornermini umiatsiaararsiniarnissamut pingasoriarluni tapiiffigineqarnissamik qinnuteqarsinnaammat ukiut aqqaneq-marlungorneri tamaasa tapiiffigineqarnissamik aqqissuussinerup iluani. Naalakkersuisut isumaqarput tamanna pissusissamisoornerusoq piniartup/aalisartup inuussutissarsiornermini arfineq pingasoriarluni tapiiffigineqartarneraninngarnit. SIK aperivoq ukiunut aqqaneq-marlungnut killiliineq sumik tunngaveqarnerusoq. APNP isumaqarpoq umiatsiaaqqat ullumi ima sanaajusut ukiuni aqqaneq marlunni atasinnaallutik. Matuma saniatigut akissutit qulaaniittut takukkit.*

Siunnersuutip § 11, imm. 1, nr. 5-ianut atatillugu IP oqarpoq aalajangersakkat inuit piniartuunermut pituttortoorsinnaagaat suliffissanik allanik pitsaanagerusunillu periarfissaqaleraluartoq soorlu aatsitassarsiornermi, takornariartitsinermi imaluunniit allanik nunami inuussutissarsiornermi. *Naalakkersuisut § 31, imm. 1–4 malillugu periarfissaqarput aalajangersaassallutik inuussutissarsiorfiit sorliit pilersaarutillu suut inuussutissarsiutit siuarsarnissaannut atatillugu taarsigassarsissutaasinnaasut. Naalakkersuisut piumasarisinnaavaat tapiissutit utertinneqassasut. § 11, imm. 1-kkut (iluarsisakkut) isuma pingaarnerusooq tassa atornerluineq ingalassimaarneqassammat, Inuussutissarsiornermut Pisorta qarfiup oqaaseqaataani taa-neqartut nassatarissallugu tapiissutinik utertitseqqusineq qajassuarnerusumik pissalluni.*

Siunnersuutip § 20-ianut atatillugu IP oqarpoq tassani aalajangersagaq inuussutissarsiornermut politikimi nunalerinerullu unammillersinnaanerusumik ineriartornissaanik periarfissaanit qulaanit isigisat eqqarsaatigalugit kinguarnerusooq aalajangersagaq aningaasanut inatsimmi tamanna pillugu oqaasertanut ilanngussamut naleqqiukkaanni. *Ingerlatsineranut atatillugu tigorianaannik akiligassarsisitsisarneq siunnersuutigineqarpoq pissutiginerullugu nunaleri-nermut taarsigassarsiaarpassuit aqukkuminarnerulernissaat. Naalakkersuisut pilersaarutigaat ingerlatsineranut atatillugu akiligassarsisitsisarnermut najoqqutaliorniartutik nalunaarutitut ilusilerlugu peqqussutissamut siunnersuut akuerineqassappat.*

Siunnersuutip § 23-anut atatillugu IP oqarpoq nunalerinermik inuussutissarsiorneq aamma pineqartutut aamma periarfissinneqartariaqaraluartoq. *Taama oqaaseqaateqarneq ikkunneqarpoq nunalerisut ilaalerlutik.*

Peqqussutissamut siunnersuummi aalajangersakkanut ataasiakkaanut oqaaseqaatit

§ 1-imut.

Imm. 1-imut 2-mullu

Peqqussutissatut siunnersuummi taamaallaat pineqarpoq inuussutissarsiutit siuarsarniarlugit taarsigassarsisitsisarneq imaluunnit tapiissuteqarneq, uani pineqarani inuussutissarsiutinik assigiinngitsunik ingerlataqarsinnaanermut periarfissanik killilersimaarinninnissamut malittarissassiuneq. Inuussutissarsiutinik ingerlataqarnermut periarfissaqarnermik killilersimaarinninneq taamaalilluni malittarisassatigut allatigut aalajangersarneqarpoq.

Uani siunertatut aalajangersakkamut siunnersuummi pingaartinneqarneruvoq inuussutissarsiutit siammasissut imminnut nammattut ineriartortinneqarnissaat, taamaattoq pingaarnertinneqarluni suliffissaqartitsiniarnerup siuarsarneqarnissaa. Inuussutissarsiummut tapersiineq aallaaviatigut oqaatigalugu unammillernerumut kipusoorutaasussaavoq, taamalu inuussutissarsiornermut sullerilluni unammillersinnaallunilu ingerlatamut akerliulluni. Peqqussummut siunnersuummi sullerilluni unammillersinnaallunilu inuussutissarsiorneq ungasinnerusoq isigalugu suliffissaqartitsilluarnermut sunniuteqartinniarneqarmat taama suliffissaqartitsiniarneq angorusunneqarpoq inuussutissarsiorneq tapiinikkut kipusoorinnagu. Taamalu kissaataavoq tapiineq aallartisaataannartut sunniutissasoq imminnut napatilernerumut aqquataalluni. Taavali erseqqissaasilaartariaqarpoq inuussutissarsiornerup siuarsarneqarnissaanut peqqussusiakkut pineqanngimmata ingerlatat maanna imminut atatittutut oqaatigineqarsinnaasut. Taamaalilluni aamma inooqatigiit aallaavigalugit isiginneriaaseq uuttuutigineqartassaaq inuit suliaqartuarnissaat pingaartinneqarnerusariaqarluni sulinatik pilersuinnarnissaannit. Taamalu naliliinerup ilagisariaqarpaa aningaasat inooqatigiit aningaasarsiorneranni iluaqutaasumik suleqataatinneqarnissaat.

§ 2-mut.

Una peqqussut malillugu aningaasartuutigineqartut Nunatta Karsianit aningaasartuutigineqassapput, aningaasat atorineqartussatut akuersissutigineqartut killiliussat ukiumoortumillu aningaasanik inatsimmi aalajangerneqartassallutik.

Siunnersuutip § 2-ani allaaserineqarput ingerlatassatut pilersaarummut piumasaasut nalinginnaasut.

"Ingerlatassatut pilersaarut"-mik taasaq qinnuteqartup inuussutissarsiorneq siuarsarniarlugu taarsigassarsiniarnermini sunik ingerlataqarniarnerminut ataatsimut allaaserinninneranut taaguutitut. Ingerlatassatut qinnuteqarnermut tunulequtaasut siunertaasa nassuiaataattut.

Aalajangersakkami taaneqarput piumasaqaatit assigiinngitsut, inuussutissarsiutit siuarsarniarlugit taarsigassarsinissamik qinnuteqartoq akuerineqarsinnaanersoq aalajangiisoqartinnagu Naalackersuisut naatsorsuutigisassaasat. Nr. 1-imit 3-mut najoqqutassatut taaneqartut oqaatiginiarpaat pineqartuni ataasiakkaani missingersuilluni naliliisarnissaq. Najoqqutassatut tassani taagorneqartut tamarmik nammassineqarsimassapput.

Nr. 1-imit.

Teknikkikkut imminut illersorsinnaasumik taasami pineqarpoq sukkulluunniit ingerlatamut pikkorissuseqavilluni, aalisarsinnaaneq, piniarsinnaaneq aamma nunalerinermik inuussutissarsiorsinnaaneq. Inatsisini atuuttuni tamanna takussutissaqanngippat pineqartut ataasiakkaat tamarmik immikkut missingersuummik nalilerneqartassapput.

Nr. 2-mut

Iluarsaanermut il.il. inuussutissarsiutinik siuarsaanermut atatillugu angallatinut ingerlanneqareersunut taarsigassarsinissamut qinnuteqaatip suliarinerani akiliutaareersut amerlassusii aalajangiisooqataassapput tunngaviit nr. 2-mi taaneqartut iluanni pilersaarut aningaasatigut atasinnaanersoq nalilerniartillugu.

"Ungasinnerusoq isigalugu"-mik oqalunnermi innersuussutigineqarpoq, inuussutissarsiutit siuarsarniarlugit taarsigassarsisitsisoqarsinnaaneranik naliliiniarnermi pilersaarutip aningaasaliiffigineqarnerani piffissarititaasup aallaavigineqarnissaa. Taamaalilluni pilersaarutip maanna "ungasinnerusorluunniit isigalugu" aningaasatigut imminut akilersinnaanera naliliifigineqassaaq pilersaarutip suuneranik, isertitsissutigisinnaasaanik taarsigassarsiallu utertinniarlugit akilersorneqarnissaata sivisussusissaa najoqqutaralugit.

Nr. 3-mut.

Nr. 3-mi erseqqissarneqarpoq pilersaarummut aningaasartuutaajumaartut iluanaarutaasinnaajumaartunut naammaginartumik naleqqunnersut. Taamaalilluni pingaarluinnartumik tunngavissaqarpoq takuneqarsinnaassalluni taarsigassarsinissamik pilersaarut ima isertitsissutaasassasoq atorniarnermut isumaqatigiissut malillugu ingerlasinnaanersoq.

§ 3-mut

Imm. 1-imit

Nr. 1-mut

Teknikkikkut illersorneqarsinnaasumik oqarneq isumaqarpoq aalisarnermut, piniarnermut nunalerinermullu pikkorissuseqavilluni sukkulluunniit

ingerlatsisinnaassuseqarnissaq. Tamanna inatsisini atuuttuni takussaangippat suliami pineqartumi missingersuilluni nalilernerqartariaqartassaaq.

Nr. 2-mut

Nr. 2-kkut taarsigassarsineq tapiinerlu erseqqissumik immikkoortinniarnearput. Taarsigassarsiat ajkilersorneqartussiaapput. Tapiissutit akilersorneqartussiaangillat. Taamaattumik tapiissutit inooqatigiit aningaasarsiornerannut iluaqutaasussatut nalilerniartariaqarput. Illersorsinnaassusermik oqarnej isumaqarpoq tapiissuteqarnissaq inooqatigiit aningaasarsiornerannik naliliinermik nalilernerqartariaqartoq.

Nr. 3-mut

Tapiinissamut atatillugu aamma pilersaarutip aningaasatigut inissisimanagera nalilerniarnearqartassaaq. Tamatumani naliliinermi uppernarsaasiinermilu piumasarisat taarsigassarsisitsinermi piumasarisannik annikinnerupput. Tamatumani aalajangiisuunerunissaq tassa tapiissuteqarnikkut qinnuteqartoq ilaqutaalu qanoq imminnut pilersorluartigisinnaanersut ikiorneqaannaratik. Tapiissutit akilersorneqannginnissaannik aallaavik taarsigassarsinissamut atatillugu § 4-mi uppernarsaatissiinissamik piumasarisamik ilaqanngilaq. Taamaakkaluaq allaganngorlugu nassuiartariaqarpoq tapiinikkut qinnuteqartoq ilaqutaalu imminnut napatissinnaasut.

Imm. 2-mut

Nunalerinermut atatillugu nunagissaneq kisivimmi tapiissuteqaataasinnaavoq. Nunagissaanissamut tapiinissaq piukkunneqarmat pissutaasoq tassa nuna Kalaallit Nunaanni pigineqarsinnaanngimmat. Taamalu nunaateqarfik inuiaqatigiinnit nunaatilimmut atukkiussaannaammat. Tassalu taamaalilluni maani aalajangersagaq aallaaveqarpoq nunagissaanikkut inuiaqatigiit nunaataata pitsanngorsarneqarneranik inuiaqatigiillu aningaasaataannit tapiiffigineqartariaqarluni.

§ 4-mut.

Pissutsinut taaneqartunut uppernarsaatit qinnuteqaatinillu naliliinerit Aalisarnermut, Piniarnermut Nunalerinermullu Pisortaqarfimmit suliarineqassapput.

Imm. 1-mut

Nr. 1-mut

Suliamut tunngatillugu piginnaasaqarnermut uppernarsaatit makkuusinnaapput: Umiartorsinnaanermut uppernarsaat, nunalerinermik ilinniarsimananermik uppernarsaat, imaluunniit kommunimi inuussutissarsiornermi siunnersortip oqaaseqaataa, inuussutissarsiutit siuarsarniarlugit taarsigassarsiniarluni qinnuteqartup sullivimmik akilersinnaasumik ingerlatsisinnaaneranik uppernarsaasoq.

Ingerlatseqatigiiffiit "sulianut piginnaasaasa" nalilerniarnerini misissor-neqassaaq ingerlatseqatigiiffiit sulisoqarnerisut ingerlatseqatigiiffimmik akilersinnaasumik

ingerlatsisinnaasunik. Sulisut assersuutigalugu kukkunersiuisuusinnaapput, siunnersuisutut ingerlatseqatigiiffimmi sulisut.

Nr. 2-mut

Qinnuteqaammut ilanngunneqassaaq ingerlatsinermut akiliisinnaassutsimullu missingersuusiaq, taassumalu takutinniartussaavaa qanoq ililluni taarsigassarsiat akilersorneqarnissaat pisassanersoq.

Naatsorsuusiani takuneqarsinnaassaaq isertitassat aningaasartuutissallu suut naatsorsuutigineqarnersut. Takussutissaaq nassiunneqassaaq tassani takuneqarsinnaassalluni isertitsinerit aningaasartuuteqarnerillu qaqugu pissanersut. Ingerlatsinermut akiliisinnaassutsimullu missingersuusiat missingersuusianullu tunngaviit ima immikkuualuttuliarineqarsimassapput pilersaarutip aningaasaqarnera nalilerneq ajornassanani.

Nr. 3-mut

Siunnersuutigineqarpoq inuussutissarsiutit siuarsarniarlugit taarsigassarsianik qinnuteqartup qinnuteqaatimi nassiunneranut ilanngussimassagai pigisamigut aningaasaatigut naleqassutsimik takussutissat tamarmiusut. Tamatumani siunertaavoq Naalakkersuisut qinnuteqartup aningaasatigut inissisimaneranik tamakkiisumik paasiniaanissaat. Taamaalilluni aamma Naalakersuisut periarfissinneqarput qinnuteqartup siusinnerusukkut Namminersornerullutik Oqartussanit tapiiffigineqarnerminik atukkernneqarnerminillu utertitsisinnaassusianik nalilii-sinnaanermut.

Nr. 4-mut

Nr. 4-mi erseqqissarneqarpoq inuussutissarsiutit siuarsarniarlugit taarsigassarsinerit akueri-neqarsinnaasut taamaallaat pisortanit akuersissutit pisariaqartut kisimik piumasarippassuk inuussutissarsiutit siuarsarniarlugit taarsigassarsisitsisoqassasoq. Taakku nunaminertamik atuisinnaanermik akuersissutaasinnaapput, aalisakkanik pisassinneqarsimanermik aalisarnissamullu akuersissutaasinnaallutik.

Nr. 5-mut

Piumasarisianik allanik taasaqarnikkut isumagineqartut tassa inatsisinit allanut piumasarisarqarnek imaluunniit pilersaarummut pineqartumut aalajangersimasumik piumasagaataasut.

Imm. 2-mut.

Qinnuteqaat sillimmasiisimanermik attuumassuteqartunik aalajangiisoqqaarnissaanik eqqartuussivimmi sulianik assigisaanilluunniit imaqarpat, suliat tamakku naammassineqarsimatinnagit, naammassineqarsimanngitsut tamakku naliliinermi ilaatinneqassanngillat. Aalajangersakkap taassuma siunertaa tassa qalleqqissarneqassasoq qinnuteqartup qinnuteqarnermi nalaani uppersarsaasersukkamik aningaasatigut inissisimanera aallaaviussasoq siunissamilu atuukkumaartut taaneqartut pissutsinut maanna atugaanut kakkersuunneqassanngitsut.

Imm. 3-mut

Qinnuteqartoq Namminersornerullutik Oqartussanit inuussutissarsiutinut tunngasunik taarsigassarsisimappat tapiiffigineqarsimalluniluunniit Naalackersuisut naliliiffigisinnaavaat qinnuteqartup taamatut siornatigut pineqarsimanermini pisussaaffini eqqortissimanerai. Tamanna §4, imm. 3-mut atatillugu periarfissiivoq Naalackersuisut piumasarisinnaammassuk ilisimatitsissutigeqqullugu qinnuteqartoq Namminersornerullutik Oqartussanit siusinnerusukkut inuussutissarsiornermut attuumassuteqartumik aningaasanik taarsigassarsisimansoq.

Imm. 4-mut

Imm. 4-mi siunnersuutigineqarpoq erseqqissarneqassasoq qinnuteqartoq pineqartoq, inuuguni ingerlatseqatigiiffiuguniluunniit inuussutissarsiutit siuarsarniarlugit taarsigassarsisinnaasoq taamaallaat angallammut ataatsimut nunalerinermilluunniit ingerlatsiffimmut ataatsimut. Tamatumunnga pissutaavoq immikkoortortamut tassunga aningaasaliissutit killeqarnerat, taper-siinerlu qangarnit annerusumik kissaatigineqarmat tamanik suliffissaqartitsiniarneq salliutinneqassasoq. Angallatit peqqussummut maanga atatillugu tassaangillat inuussutissarsiutigalugu umiatsiaarassat. Angallatit maani eqqarsaatigineqartut assersuutigalugu tassaapput angallatit angisuut 28, 33 imaluunniit 42 fodsit.

Aalajangersagaq taamaallaat inuussutissarsiutit siuarsarniarlugit taarsigassarsianut tunngasuvoq.

§ 5-imut.

Imm. 1-imut

Aalajangersakkakut siunertarineqarpoq inuussutissarsiutigalugu umiatsiaarartaartornissap iluaqusernissaa inuussutissarsiutigalugu Kalaallit Nunaanni umiatsiaaraqarnermi qaqugukkulluunniit teknikkikkut piumasarineqartut minnerpaaffissaannut naleqquttumik piukkunnannginnerusunik pissarsinnermut taarsiullugu.

Nr. 3 malillugu Naalackersuisut inuussutissarsiutigalugu umiatsiaaqqamut sanarlaamut tapiissuteqarsinnaangillat umiatsiaaqqap sumut atortussaanera akuersissutigineqarsimatinnagu.

Umiatsiaaraq Sufartsstyrelsemit typetut akuerineqarsimassaaq allamilluunniit akuersisartutut ilisimaneqartumit akuerineqarsimassalluni. Akuersissut piumasarineqarpat Namminersornerullutik Oqartussat inuussutissarsiornermut tapiisarnermut immikkoortortaqarfimmut takutinneqarsimassaaq.

Inatsisartut peqqussutaata aalisarnermut, piniarnermut nunalerinermullu peqqussutaata atuuttup malitsigisaanik umiatsiaaraliortartoq aamma suliami akuerineqarnissaanik pissarsi-sinnaavoq Naalackersuisut tamatumunnga qinnuteqarfigalugit Naalackersuisullu aalajangissavaat umiatsiaaqqap teknikkikkut piumasarisat minnerpaaffissaat naammassisimanerai.

Imm. 2-mut

Siunnersuutigineqarpoq annerusumik piniarnermik inuussutissarsiuteqartut nutaamik umiatsiaararsinissamut tapiissuteqarfigineqartassasut. Inuussutissarsiutigalugu umiatsiaaqqamik sanarlaamik aalisarnermut atugassamik pissarsinissamut aamma qinnuteqarnej ajornanngilaq. Inuussutissarsiutigalugu umiatsiaaqqamut aalisarnermut atugassamut tapiissut pingaartumik aalisarfinni aalisarsinnaassusermik tamakkiiffiusimanngitsuniittuni tunniunneqartassaaq. Tamatumani tulleriarinermi aalajangerneqassaaq inuiaqatigiinni aningaasarsiornej eqqiluisaarnikkullu naliliinnermit. Taamaalilluni piniarnermik ingerlatsinermi tamatumani nerisassaatinik eqqiluitsuutitsinissamik piumasarisat sukkulluunniit eqquutitinneqarsimassapput. Ilanngullugu tapiineq tulluarsarsimassaaq suliniutinut piniartuunermik aalisartuunermillu sapinngisamik nammineq napatissinnaasunut.

Imm. 3-mut

Aalajangersakkap maliinnarpaa aalisarnej, piniarnej nunalerinerlu pillugit peqqussut maanna atuuttoq. Tapiissutissat annertussusissaat taaneqareersunit 75% aamma 84 %-init annertunerussanngillat.

Qaanaap, Ammassallip Ittoqqortoormiullu kommuunini isertaqartarnermut allaninngarnit periarfissalunnerunera pissutigalugu taakkununnga tapiissut 84 %-iutinneqarpoq allani 75%-iusoq. Piffinni pineqartuni tapiissutip annertunerunanut pissutaavoq taakku immikkut ittumik piniarnermik aalisarnermillu isertitaminnik tunaartaqarneruneranik, tassunga ilaalluni piffinni pineqartuni misilittagaammat isertitaqarsinnaanerup annikinnerunera.

Imm. 4-mut

Qalleqqissarneqassaaq § 5 tapiissutit tunniunneqarneriinnaannut sammimmat. Aalajangersagaq manna malillugu ataatsikkut tapiissuteqarlunilu inuussutissarsiut siuarsarneqarnissaannut atatillugu taarsigassarsisitsisoqarsinnaanngilaq. Aalajangersagaq manna Naalakkersuisut ilanngussimavaat inuussutissarsiutigalugu umiatsiaaqqamut Naalakkersuisut ilivitsumik a-ningaasaleeqataajumanngimmata. Taamalu Naalakkersuisut tapiisinnaapput aningaasaliinerup sinnera qinnuteqartumit namminermit isumagineqassalluni.

§ 6-imut.

Nr. 1-imut.

Siunnersuutigineqarpoq qinnuteqartut ukioqqortussusissaannik piunasaqaateqartoqassasoq. Siunnersuutigineqarpoq qinnuteqartoq qinnuteqarnermi nalaani inuussutissarsiutigalugu piniartutut aalisartutulluunniit nalunaarsuutiniissasoq qinnuteqaateqarnerullu tungaanut ukiuni marlunni taamatut allagartaqarsimassasoq. Taamaalilluni siunnersuutip § 3-atigut periarfissaqalerpoq qinnuteqartumik tamakkiinerusumik naliliinissamut taassuma siusinnerusukku isertitaqarnermigut inuussutissarsiornermigullu atugai oqimaaloqutaasinnaanngorlutik. Siunertap, piumasarisat naliliinermilu tunngaviup aamma assigiinnassavai §§ 2 aamma 3-mi taagorneqartut, taakkununnga oqaaseqaatit takukkit.

Siornatigut periaasiusoq allangortinneqarpoq inuussutissarsiutigalugu aalisartut § 5, imm. 2 malillugu aamma tapiiffigineqarsinnaanngormata.

Nr. 2-mut

Siunertap, piumasarisat naliliinermilu tunngaviup aamma assigiinnassavai 3-mi taagorneqartut, taakkununnga oqaaseqaatit takukkit.

Imm. 1-imut 2-mullu

Aallaavittut oqaatigissaaq tapiissutit utertitaasussaannimmata. Tamanna erseqqissarneqarpoq § 11-kkut, tassani atuarneqarsinnaalluni Naalakkersuisut qanoq inneratigut piumasarisinnaagaat tapiissutit uterteqquneqassanersut.

§ 7-imut

Nr. 1-imut

Nunagissaanermut atatillugu taamaallaat tapiineqarsinnaavoq qinnuteqartoq nunalerinermik ingerlataqareerpat. Taamaammat nunalerinermik aallartisaasoq tapiiffigineqarsinnaanngilaq.

Nr. 2-mut

Qinnuteqartup uppersarsinnaasariaqarpaa nunalerinermi ingerlalluarnernissaanut iluaqutaassasoq. Tassa qinnuteqartup nassuiartariaqarpaa nunagissarneq ingerlalluarnernissami pisariaqarluinnartuusoq. Aalajangersagaq taamaalilluni ingerlatsinermut atatillugu nunagissaasoqartariaqarneranut tunngavilersuussinermut tikkuussivoq.

Nr. 3-mut

Nunagissaanermi naatsorsuusiornissamik siunertaq nunalerinerup aningaasarsiornikkut pitsaanerulernissaanut tunngavoq suliallu aningaasartuutissaasa immikkuualuttutigut takuneqarsinnaanerannik piumasaqarluni. Tamatuma saniatigut nunalerisup nammineq nersutinut nerisassanik pissarsiniarneranut sipaarutit/isertitat suunersut misissorneqartassapput, saniatigullu uumasut nerisassaasa naatinneqarnerannut aningaasartuutit taakkununngalu atatillugu naggorissaanermut aningaasartuutit ilannguneqassapput. Taama piumasaqarneq aallaaveqarpoq nunagissaaneq sukumiisumik paasisariaqarmat nunalerinermik ingerlatsivimmut pineqartumut qanorpiaq pitsaaqutaatiginersaq.

8-mut.

Imm. 1-imut

Siunertaasoq tassa inuussutissarsiornermik siuarsaanissamut atatillugu taarsigassarsisoqarsinnaassasoq aalisariutinik sanaqqiinnermut iluarsaassinermullu annertunerusunillu pissarsiniarnernut soorlu motoorinut, sillimaniarnermi atortunut aalisarnermilu atortunut atugassanik. Tamatuma saniatigut taarsigassarsineq ajornassanngilaq ingerlatsinermi atortunik pisariaqartunik pissarsiniarnermi teknikkikkullu ikkussuinernut. Nalinginnaasumik aserfallatsaalineq iluarsaassinerlu tamatumani pineqanngillat.

Aalajangersakkakut periarfissiineqarpoq aalisariutip nutarternissaanut, aalisariutip imminut napatissinnaanera unammillersinnaaneralu pitsaanerulersinneqarlutik. Pitsannguallaatit assersuutigalugu tassaasinnaapput aalisarnermi qajassuussinerusunik atortunik, ikkussuinnilluunniit orsussamut sipaarutaasinnaasunik pissarsinerit. Unammillersinnaaneq pitsaanerulersinneqarsinnaavoq suliniutigut aningaasartuutinik ikilisitsinertigut imaluunniit pisat ataatsimut naleqarnerulernerisigut.

Imm. 2-mut

Inuussutissarsiutit siuarsarniarlugit taarsigassarsineqarsinnaanngilaq Naalakkersuisut naliliippata qinnuteqartup aalisartutut pissusissamisoortumik aningaasarsiornini attassinnaanngikkaa.

Nalinginnaasumik isertitaqarneq isumaqarpoq, aalisariutip suunerata, aalisarnerup piffimmi aalajangersimasumilu suussusaa isigalugit agguaqatigiissillugu isertinneqarsinnaasutut naatsorsuutigineqarsinnaasut. Aalajangersakkami pingaartinneqarpoq siuliniutunut pilersaarummi aningaasarsiornierup ataatsimut nalilerneqarnissaa. Uani isiginiarneqassaaq pilersaarutip iluanaaruteqarsinnaanera ima annertutigisinnaanersoq, taarsigassarsiat akilersorneqarsinnaallutik aammalu pilersaarummi aningaasartuutigineqartunut tamarmiusunut naammaginartutut isumaqarnarlutik. § 2-mi aalajangersagaq qinnuteqaatip nalilerniarneqarnerani atorneqassaaq.

§ 9-mut.

Siunnersuutigineqarpoq aalajangersagaq ilanngunneqassasoq, tassani pingaarnertut ukiut aqqaneq marluk aatsaat qaangiukkaangata umiatsiaaqqamut pisinissamut tapiisoqarsinnaassasoq. Tamatumunnga patsisaavoq tapiissutisisup aserfallatsaaliilluarnissamut kajumissaarnissaa angallallu sillimmaserneqarsimassasoq. Umiatsiaaqqamik piffissaq tunniussivissaq pisinermut isumaqatigiissuteqarnermullu malittarisassat nalinginnaasut malillugit aalajangerneqassaaq. Ukiut aqqaneq marluk pineqarput inuussutissarsiutit siuarsarnerannut atatillugu peqqussusiami aningaasat atorneqartussiat eqqarsaatigalugit umiatsiaaqqallu nutaajunerminit qanoq sivistigisumik atalluarsinnaasutut naatsorsuutigineqarnera eqqarsaatigalugu.

§ 10-mut.

Imm. 1-imut

Siunnersuutigineqarpoq siunnersuutip § 9 sanioqqutitsineqartassasoq umiusoqarsimappat arlaannilluunniit pisoqarsimappat taarsigassarsinermi siunertatut umiatsiaaraq atorsinnaajunnaarluni, umiatsiaarlu sillimmasersimappat. Tamatumani siunertaavoq umiatsiaaqqamik piginnittup ikiornissaa umiatsiaaqqani sillimmasersimasoq assuarineqaatigisinnaanngisaminik nalaataqarsimammat.

Nr. 1-mut

Tulluartumik/pissusissamisoortumik sillimmasersimaneq isumaqarpoq inuussutissarsiutigalugu umiatsiaaqqap nalinginnaasumik naammaginatumillu sillimmasersimanera.

Nr. 2-mut

Piumasaqaataavoq sillimmasiinermit taarsiissutissaq akilerneqassasoq, Naalackersuisullu sillimasiinermit taarsiissutinik pinissamut periarfissaqassasut.

Imm. 2-mut.

Tapiissut naatsorsorneqassaaq inuussutissarsiutigalugu umiatsiaaqqap pissarsiarinerani akiata 75%-iatut (84%-iatut) sillimmasiisimanermit taarsigassarsiat ilanngaatigalugit. Peqqussut una malilugu qinnuteqartup umiatsiaaqqap akianit 25% (16%) akilertussaammagu pissusissamisoortutut isigineqarpoq, sillimmasiisimanermit taarsigassarsiat pisinermi akimit ilanngaatigineqarnissaat. Taamaalilluni sillimmasiisimanermit taarsigassarsiaq umiatsiaaqqap tapiippigineqarsimanerannut tunngasuinnaq ilanngaatigineqassaaq. Tapiissut nutaaq naatsorsorneqassaaq umiatsiaaqqap pisiarinerata akiata 75%-ianik (84%-ianik) ilanngaatigalugu sillimmasiisimanermik taarsigassarsiap 75%-ianik. (umiatsiaaqqap pisiarinerani aki 0.75-imik amerlisarneqassaaq ilanngaatigalugu taarsigassarsiarineqarsimasup 75%-ia).

Imm. 3-mut.

Taartissamik umiatsiaararsinermi tassungalu atatillugu tapiinermi nalinginnaasumik tapiisarnermi §§ 3, 5 aamma 6 –imi aalajangersakkat atuutissapput.

§ 11-mut.

Naalackersuisut periarfissaqarput § 11 malillugu tapiissutit utertinneqaqqussallugit, kisianni tapiissutit utertinneqaqqullugit pisussaaffeqaratik aalajangersakkani taaneqartuni.

Nr. 1-imut.

Siunnersuutigineqarpoq immikkuualuttunik malittarisassaliorneqassasoq tapiissutit utertinneqaratarsinnaanerannut atasunik kissaataammat atonerluinissaq pinaveersaarneqassasoq. Nr. 1-p nassataraa tapiiffigineqartoq inuussutissarsiutigalugu piniartutut aalisartutulluunniit nalunaarsorsimajunnaarsimappat tapiissutisinissamut piumasarineqaaqaartut tammarsimassasut tapiissutinik utertitseqqusinissaq piumasarineqarsinnaalluni. Taamaakkaluaq isiginiar-neqassaaq qinnuteqarsimasooq qanoq sivisutigisumik inuussutissarsiutigalugu piniartuulluniluunniit aalisartuusimansooq tapiissutinik pinermi kingorna. Ilanngullugu naatsorsuuti-gisassanut ilaavoq qinnuteqarsimasup nutaamik suliffeqalersimanera ilinnialersimaneraluunniit. Tamakku pineqartillugit sallaatsumik naliliinissaq pisariaqassaaq qinnuteqarsimasooq piniartutut/aalisartutut ingerlaniinnaqqunagu.

Nr. 2-mut.

Aalajangersagaq ima paasineqassaaq tapiissutisisimasoq inuussutissarsiutigalugu umiatsiaaqqaminik akissarsiteqarnerusutut isigineqanngitsoq Naalakkersuisut piumasarinnaavaat tapiissutit utertinneqassasut. Naliliineq aallaaveqassaaq ukiumut nalunaarsuutunik pisallu nalunaarsorneqarnerannilluunniit. Pisat allanngorarsimanerat isiginiarneqassaaq.

Inatsisini allani inuussutissarsiutigalugu piniartuunerup aalisartuunerulluunniit nassuiar-neqarnerat allannguuteqarsimappat nassuiaat taanna nutaaq atuutilissaaq isertitaqaataanerusutut isigalugu piumasarisamut taarsiullugu.

Nr. 3 aamma 4-mut

Aalajangersagaq ilanngunneqarpoq inuussutissarsiutigalugu umiatsiaaqqap sanioqutitsilluni aningaasanik atorniarnermut tunngavigineqarnissaa pinaveersimatinniarlugu taamalu tapisisimasup aningaasarsiornera taamaalilluni oqimaalleqqunagu kiisalu tapiissutit Naalakkersuisuneersut aningaasaqarnikkut iluanaarniutiginiaqqunagit.

Nr. 5-mut

Tapiissutunik pisimasoq pisaminik tunisaminut uppernarsaatini nassiussisanngippat aalaja-ngersakkakut Naalakkersuisut periarfissaqarput tapiissutit utertinneqaqullugit, § 30, imm. 3 tassungalu oqaaseqaatit malillugit.

Nr. 6-mut

Naalakkersuisut tapiissutit uterteqqusinnaavaat Naalakkersuisut piumasarisaattut qinnuteqartup tapiinissamut piumasarisat qaangiinnarsimappagit qinnuteqartulluunniit piumasarisat eqquutitissimanngippagit.

§ 11-mut atorpoq, pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaat, aalisarnermik, piniarnermik nunalerinermillu inuussutissarsiutiillit inuussutissarsiornerannik siuarsaneq pillugu Inatsisartut peqqussutaat malillugu pisassanut atuutissasoq, tassami siunnersuutip imamigut assigimmagu Aalisarnermut, piniarnermut nunalerinermullu tapersiisarneq pillugu Inatsisartut peqqussutaat.

§ 12-imut.

Imm. 1-imut

Aalajangersagaq imaqarpoq tapiissutit ikilisarneqassasut ukiut 12-it ingerlaneranni pinerit tamaasa 1/12-mik, tapiissutit tuniunneqarnerannit.

Imm. 2-mut

Assersuut: Tapiissutit inusnaanunni tunniunneqarput 30.juni 2006. 11. januar 2011 utertitsinissamik piumasaqaat naatsorsorneqassaaq tapiissut tunniunneqarsimasoq 6/12-nik gangerlugu. Ukioq aallartinneqartoq isumaqarpoq qaammatisiutit malillugit ukioq. Tapiissutit tigunerat isumaqarpoq ulloq tapiissummik tunniussiffiusoq.

§ 13-imut.

Imm. 1-imut

Uumasuuteqarneq qinerneqarpoq savaateqarfiit ingerlanneranni qitiummat savaaqqanik toqugassanik tuniniaaneq. Inuutissarsiutit siuarsarniarlugit taarsigassarsisitsisarneq uumasunut allanut toqugassanut atorneqarsinnaavoq. Nunalerineq taamaalilluni isumaqarpoq inuussutissarsiummik ingerlatsiffik narsaatilerinermik uumasuuteqarnermillu ilalik.

Imm. 2-mut

Nunalerinermi illuutitut atugassanik inuussutissarsiutit siuarsarniarlugit taarsigassarsisitsisoqarsinnaavoq. Illut taama atukkat assersuutigalugu tassaasinnaapput nersutaasiviit, ivigaasiviit imaluunniit maskiinanik iluarsaasarfiit.

Imm. 3-mut

Una peqqussut malillugu piginnittumut, atuisumut, pisortaasumut imaluunniit ikiortimut najugassamik illumut ataatsimut inuussutissarsiutit siuarsarniarlugit taarsigassarsisitsisoqarsinnaanera pissuteqarpoq, najugaralugu illuutit pigisanut ataatsimoortunut ilaanissai kissaatigineqarmat. Nunalerineq nassuiarneqartussaavoq illuutit ataatsimut isigalugit, illut najugarineqartut ilanngullugit, kisianni killeqartumik ima inuussutissarsiutit siuarsarniarlugit taarsigassarsisitsisoqarsinnaalluni illumut ataasiinnarmut. Tamatumani siunertarineqarpoq nunalerinermi pigisat ataatsimoortinneqarnissaat, soorlu pinngitsoorumallugu assersuutigalugu nunalerinermut piginnittumullu/-nullu attaveqangitsumit naapertuutinningsumik najorneqarnissaa.

§ 14-imut.

Naalackersuisut nutaatut § 14 malillugu siunnersuuteqarput piginnittunngortumut inuussutissarsiutit siuarsarniarlugit taarsigassarsisoqarsinnaasoq tunuartup nunaateqarfisimasamini illussaanut sananissamut. Siornatigut pissutsinut naleqqiullugu aalajangersagaq taanna nutaajuvoq. Eqqarsaatigineqarpoq periarfissiissut kinguaariit nikinneranni piginnittup nutaap ilaqutaasa qaninnerpaat ineqartinneqarnissaannut atorneqassasoq.

Erseqqissarneqarpoq nunalerinermik piginnittoq taamaallaat inuussutissarsiutit siuarsarniarlugit taarsigassarsinnaasoq tunuartup illussaata sananeranut, piginnittup nammineq pigisarippagu pigisallu tamarmiusut ilagippassuk. Tamatumani siunertarineqarpoq nunaleriffiup ataasiuinnarnissaa soorlu pinngitsoorumallugu assersuutigalugu tunuartup illuata nunaateqarfimmut piginnittumullu /-nullu attaveqangitsumit naapertuutinningsumik najorneqarnissaa.

Suliniut taanna nutaajuvoq Naalackersuisut taama illorineqartussamut inuussutissarsiutit siuarsarniarlugit taarsigassarsisitsinnaalernerat. Tamatumani anguniarneqarpoq illuutunik piginnittut siulliit illuutaat aalajangersakkami aamma ilaatinnaat ammaaffigineqassasoq. Ilanngullugu siunertaavoq piginnittuusimasup

illussaanic inuussutissarsiutit siuarsarniarlugit taarsigassarsisitsineq peqqussummi matuma ilaalissasoq illu piginittumit nutaamit tiguneqarpat taanna aamma inuussutissarsiutit siuarsarniarlugit taarsigassarsiniarsinnaassammat. Aalajangersakkami oqaatiginiarneqarpoq illu pineqartoq tassaasoq ingerlataminik allamut tunniussisup illugisimasaa.

§ 15-imut.

Imm. 1-mut

Pisinermi aki, inuussutissarsiutit siuarsarniarlugit taarsigassarsiniarniarnermut qinnuteqaataasumut ilaapput, illup sananeranut, ilaneranut aamma nunalerinermik ingerlatamut atatillugu inuussutissarsiornermut atorneqartunik illunik pitsanngorsaanernut imaluunniit immikkut illumut ataatsimut, tassa piginnittuusimasup illuanik taaneqartumut, nunalerinermik ingerlatsiviup allamit tiguarneqaneranut atatillugu aningaasartuutissat makkuupput: Illup tunngaviliortunut assassortunut akissarsiat, sanaartornermut atatillugu aningaasartuutit allat aamma teknikikkut, inatsisilerinikkut aningaasatigullu siunnersorneqarnermut aningaasartuutit.

Imm. 2-mut

Nunalerinermik ingerlatsiviup allamit tiguarneqaneranut atatillugu aalajangersakkap aalajangerpaa, pisinermi akip ilagigai nunalerinermi pisariaqartinneqartut illuutit tamaasa, maskiinat, nersutaatit atortullu allat.

Teknikikkut, inatsisilerinikkut aningaasatigullu siunnersorneqarnissamik isuma aalajangersakkani marlunni taakkunani tamatigut ilaavoq qinnuteqartoq sapinngisamik ajunnginnerpaamik aallaaveqarluni sanaartornermik aallartitsisinnaaniassammat ingerlatamilluunniit pisiniassammat.

Imm. 3-mut

Naalakkersuisut inuussutissarsiutinik siuarsaanermut atatillugu taamaallaat taarsigassarsisitsisinnaapput nalinginnaasumik pineqartutut sanaartornernut tigusinernulluunniit aningaasartuutaasartut missingi pineqarpata.

§ 16-imut.

Nr. 1 aamma 2-mut

Inuussutissarsiutit siuarsarniarlugit taarsigassarsisitsisoqarsinnaavoq ingerlatsinermi atugassanut nunalerinerlu ingerlanniarlugu pisariaqartitanut allanut atugassanut.

Nr. 3-mut

Erseqqissarneqarpoq umiatsiaararsiniarnermut taarsigassarsineq inunnik nalinginnaq angallassinermut sammitinneqarmat. Taamaalilluni isumagineqanngilaq inuussutissarsiutigalugu umiatsiaararisassamut taarsigassarsisitsineqartoq. ATV-mik („motorcykelinut" assakaasui 4-t tamarmik maskiinamit ingerlatitanut) pissarsinissamut atorniarneq taamaallaat pisinnaavoq aalajangersakkap nr. 1-a

atorlugu, tassa imaappoq nunalerinerup ingerlanneranut pineqartoq atugassaappat, taamaalilluni siunertarineqanngitsumik pinngortitami dirt-track-imik (biilit angallavii kusananngitsut) aaqqissuussinerit pinaveersaarniarlugit.

§ 17-imut

Siunnersuutigineqarpoq kinguaassioritassanik uumasuutitaarnissamut periarfissat massakkut atuuttuusunut naleqqiullugu killilerneqassasut. Taamaalilluni inuussutissarsiutit siuarsarniarlugit taarsigassarsineqarsinnaavoq taaneqartuni pingasuinnarni, siornatigut ataatsimut isigalugu nersutaatitaarnissamut atukkiinissaq periarfissaagaluaq. Tamatumunnga patsisaavoq ilimagineqarmat savaatillit nunalerisullu allat uumasuutaat tunngaviusumik namminneq kinguaassioritassanik uumasuutitaarsinnaasut imaluunniit uumasuutit kinguaassioritussat savaatillit allat paarlaateqatigalugit pissarsiarineqarsinnaasut.

Nr. 1-imut

Nunalerinermik ingerlatsiffiup angissusianut naleqqiullugu aalajangersimalluinnnaqqissaartumik naliliinermik piumasaqarpoq.

Nr. 2-mut

Taamaaqataanik oqalunneq isumaqarpoq pissutsit nalinginnaasumik ingerlatsinerup nassatarinngisai.

Nr. 3-mut

Nr. 3 malillugu inuussutissarsiutit siuarsarniarlugit taarsigassarsisitsisoinnaanngitsoq assersuutigalugu savaateqarfimmik nutaamik aallartitsinermut atatillugu nersutinik kinguaassioritassanik pissarsinissamut. Ingerlatsinermit pineqartut tassa nunalerisutut ingerlatsinerit.

§ 18-imut.

Naalackersuisut iluarsaassinernut inuussutissarsiutit siuarsarniarlugit taarsigassarsisitsisoinnaapput §§ 13, 14 amma 16-ini taaneqartut. Pimasqaataavoq iluarsaassinerup nunaleriffiup ingerlaannarnissaanut pingaaruteqartuunissaa nalinginnaasumillu naatsorsuutigisamillu aserfallatsaaliinermut ilaanatik. Tamatumani pineqarput iluarsaassinerit, nutarterinerit allanngortitserinerillu nalinginnaasumik aserfallatsaaliinerup avataaniittut. Tamatumunnga patsisaavoq ilimagineqarmat nalinginnaasumik aserfallatsaaliineq ingerlatsinerimut aningaasartuutit nalinginnaasut ilagissagaat.

PiumasarisAQ nunaleriffiup ingerlaqqinnissaanut iluarsaassinerit pingaaruteqavissuussasut isumaqarpoq iluarsaassineq pisimanngikkaluarpas nunaleriffiup ingerlaqqinnissaa qularnartoqalersimassagaluartoq.

§ 19-imut.

Imm. 1-imut

Aalisarnermut, piniarnermut nunalerinermullu tapersiisarneq pillugu Inatsisartut peqqussutaanni atuuttumi § 12 malillugu narsaasiornernut taarsigassarsisoqarsinnaavoq 30 % nammineq akilerlugu 70%-ilu erniaqaranilu akilersugassaannngitsumik taarsigassarsiallugu. Maanna tamanna allannngortinneqassasoq siunnersuutigineqarpoq tapiissutinngorlugu, allaffissorneq oqilisarumallugu. Tapiineq ataasiaannarluni pisassaaq taarsigassarsiallu utertinniarlugit akilersortinnissaannut aqutsiniarneq piffissaajaatigineqassanngilaq.

Imm. 2-mut

Suliap annertussusia tunngavigalugu tapiissuteqartoqassaaq. Oqaatsip "tapiissut"-ip atornerqarnera imatut paasineqassaaq naatsorsuutigineqartuortoq nunaatilik nammineq nunap sularineranut peqataassuteqassasoq sulinermigut maskiinat atorneratigut il.il.

Savaateqarnermut atatillugu siunnersortitigut naliliisimaneq aallaaviussaaq. Suliap qanoq inneratigut isumagineqarpoq nunaminertap qanoq innera assersuutigalugu ujaaraqarnera qanorlu naggoritsiginera.

Imm. 3-mut

Nunagissaanermut tapiissutit §§ 3 aamma 7-imi piumasarisat naliliissutillu malillugit tunniunneqassapput.

Naalakkersuisut nunagissaanermut tapiisarneq pillugu maleruagassanik nalunaarusiakkut aalajangiissapput, malillugu siunnersuutip § 31, nr. 5-ia.

§ 20-mut.

Aalisarnermut, piniarnermut nunalerinermullu peqqussummi maanna atuuttumi nunalerinermut taarsigassarsisitsisarnermut taarsigassarsisitseriaatsit assigiinngitsut 14-it, ernialersukkanut 7-nut ernialersugaanatillu akilersugassaannngitsunut 7-nut agguataarneqarsimasunut, neqeroorutigineqarsinnaapput.

Nunalerisoq akulikitsumik amerlasuunik minnerusunik taarsigassarsiaqartarpoq, piviusumik ingerlatsinerup annertunersaa inuussutissarsiutinut tapersiisarnikkut taarsigassarsianik aningaasalersorneqartarmat.

Assersuutigineqarsinnaavoq nunalerisoq assigiinngitsunik 21-inik taarsigassarsiaqarsinnaasarmat. Taarsigassarsianit 21-init taakkuninnga 8-nut "taarsigassarsianut minnerusunut" atatinneqarsinnaapput, taakkunani taarsigassarsiat atsiorneqarnerminni angissusiat minnerpaaq assersuutigalugu 1.500 kr.- iusinnaalluni.

Aalajangersakkami nutaami uani eqqarsaataavoq, taakku "taarsigassarsiat minnerusut" ingerlatsinermi akiligassarsianut katersorneqassasut, taamaalilluni allaffissorneq pappialarsornerlu ullumikkumut naleqqiullugu millisinneqassalluni.

Ingerlatsinermit akiligassarsisitsisernerup eqqunneqarnissaa siunnersuutigineqarpoq ilaatigut nerukkaatissanik naggorissaatigalugulu siaruartigassanik pisinermut ernialinnik 100%-imik taarsigassarsisitsisernermit taarsiullugu. Taamaallaat toqqaannartumik nerukkaatissanut, naggorissaatigalugulu siaruartigassanut assigisaannullu aningaasartuutit, ingerlatsinermit akiligassarsianit aningaasaliiffigineqarsinnaapput. Ammaaffigineqarporli pisiassat aserfallatsaaliinerillu annikinnerusut ingerlatsinermit aningaasartuutissanit matussuserneqarsinnaasut.

Imm. 1-mut

Ingerlatsinermit akiligassarsisitsineq nunalerinermit pingaarutilik aalajangersimasumik siunertaqartumik pingaarutilik periarfissanngorpoq. Nunalerinermit ingerlatsinermit atassuteqartunut pisinermut aningaasartuutitut allanut minnerusunut, aserfallatsaaliinermit minnerusunut, ingerlatsinermit akiligassarsisitsineq aqqutigalugu akiliisoqarsinnaavoq.

Taama akiligassarsisinnaaneq atulissaaq pingaartumik allaffissorineq oqilisarniarlugu qinnuteqaateerarpasut isummerfigissaarlugit ingerlatsinermit akiligassarsisitsisalerikkut. Aningaaserivinniit atukkanut / akiliutigeriaannagassatut taarsigassarsianik qularnaveeqqusiiumannginnermit pissutaavoq Naalakkersuisut aningaasat ingerlatsinermit atorneqarsimanerannik allanulluunniit atorneqarsimanerannik nakkutiginninnissartik annaajumanngimmassuk. Aningaasartuutit aningaasartuutaareersimasut aningaasallu inuttaanut ingerlatinneqassasut aalajangerneqassapput assersuutigalugu fakturamik takutitsisoqarsimappat aatsaat, taamaaqataanilluunniit pisoqarsimappat. Aningaasartuutit akiliutaareersimanerannik uppernaarsaatinik Naalakkersuisut piunasaqarnerat pissuteqarpoq, Naalakkersuisut ingerlatsinermit pisussaaffeqarmata, akileraartartut aningaasaataat, Naalakkersuisut innuttaasunut atugassiissutaat, ilumut akiligassarsisitsinermit tunngavigineqartunut piunasaqaatinut atorneqarnerisut nakkutigiumallugu.

Naalakkersuisut soorunami soqutigaat inuiaqatigiit aningaasaataasa siunertaq malillugu agguanneqarsimanerisa uppernarsarsinnaanissaat aalajangersakkap matuma anguniagaatut siunertalimmik.

Imm. 2-mut

Siunertat imm. 1-imi taaneqartut saniatigut pissutsinut immikkut ittumik takkuteriataartunut taarsigassarsianik tiguisoqarsinnaavoq. Atorneqarfissaatut eqqarsaatigineqarput atugassarititaasut imaassimappata erniinnarluinnaq qanoq iliortoqanngippat annaasaqarnissamik navianartorsiortoqalersinnaalluni. Uani siunertaavoq nunalerisup ikiorneqarnissaa, pisimasut pisimanerannut avoqqaarinartumik pisoqarsimanngippat. Assersuutigalugu maskiinanik iluarsaasariaqarneq taamaanngippat nerukkaatissanik / naatitanik katersuineqarsinnaanngimmat.

Imm. 3-mut

Naatsorsuutigineqarpoq peqqussutissap akuerineqareerneratigut ingerlatsinermit akiligassarsisinnaanermut piunasaqaatissat aalajangersarneqassasut.

Naatsorsuutigineqarportaaq Naalakkersuisut ingerlatsinermut akiligassarsiat utertinneqarnissaat pillugit maleruagassanik aalajangersaassasut. Aalajangersakkami taaneqarpoq Naalakkersuisut ingerlatsinermut akiligassarsisitsinermi aalajangersimasumik ernialersuisassasut. Nalunaarusiami taaneqarsinnaavoq piumasareqqaarneqartut suunersut tunngavigalugit ingerlatsinermut akiligassarsiat tunniunneqarsinnaanersut.

§ 21-mut.

Imm. 1-imut.

Taarsigassarseriaaseq nutaaq taaneqartoq "inuussutissarsiutit siuarsarniarlugit taarsigassarsineq" allaffissornermut oqilisaataassaaq kiisalu utertillugit akiliinissamut kajumissaataassalluni. Inuussutissarsiutit siuarsarniarlugit taarsigassarsisarnerup taarsigassarsinnaanerit atuuttut taarsissavai. Inatsisartut peqqussutaanni atuuttumi taarsigassarsinerit ataasiakkaat procentikkuutaarlugu aalajangersaavigineqarsimapput taarsigassarsinerup ilaa qanoq angitigisoq erniaqartinneqaranilu akilersugassaassanngitsoq, qanoq angitigisoq ernialersugaassasoq qinnuteqartorlu nammineq qanoq ilisaqassasoq. Tamanna siunnersuutigineqarpoq allanngortinneqassasoq taarsigassarsianut ikiutissatut angissutsit peqqussusiamut nutaamut atatillugu allassimasut nalunaarutikkut aalajangersaavigineqartassasut. Taamaalilluni peqqussusiaq nutaaq eqqartorneqartunut atatillugu paasiuminarsagaavoq.

Imm. 2-mut

Tapiissutit annertussusissaat aalajangersagaq manna malillugu akilersuutip 50%-iatut tagginneqarsinnaavoq.

Assersuutigalugu taarsigassarsiamut akileeqaataassutit annertussusissaat aalajangerneqarsinnaavoq, imaalillugu taarsigassarsisoq 1 kruunimik akiliuteqarpat akiligassai 1,25 kruunimik ikilineqartussanngorlugit. Taamaalilluni taarsigassarsisoq Naalakkersuisunit 25 uringimik pissarsisarpoq, imaluunniit taarsigassarsiat ikilisarnissaannut akilersuutip 20 %-ianik tapiiffigineqarluni inuussutissarsiutit siuarsarniarlugit taarsigassarsiat ikilisarnissaannut atatillugu.

Imm. 3-mut

Imm. 3-mi ilanngunneqarpoq aalajangersagaq nunaateqartut peqatigiillutik maskiinanik pisinissaannut kajumissaataasusaaq tamatumuunalu aningaasartuutit tamarmiusut ikilisarlugit.

Imm. 4-mut

Akileeqaataassutit annertussusissaat Naalakkersuisunit aalajangerneqassaaq inuussutissarsiutit pingaarnerit aalajangersimasut iluanni siuarsaanissamik Naalakkersuisut kissaataat naapertorlugi. Taarsigassarsiat ikilisarnissaannut akileeqaataasutit atukkiussinerit ataasiakkaat eqqarsaatigalugit akilersuiffissamut tamarmut atuutissapput.

Imm. 5-imut

Erniaritit akileeataassutissallu annertussusissaat Naalakkersuisunit aalajangiiffigineqartassapput, nalunaarutikkut aalajangersarsimasinnaapput akileeataassutissat annertussusissaat, inuussutissarsiutit assigiinngitsut sumiiffillu Naalakkersuisunit pingaarnersiorneqarlutik.

§ 22-mut.

Imm. 1 aamma 2-mut.

Inuussutissarsiutit siuarsarniarlugit taarsigassarsisitsiniarlutik Naalakkersuisut aalajangerunik piumasarisinnaavaat qinnuteqartoq nammineq minnerpaamik 10 %-imik aningaasaliissuteqartariaqartoq. 10 %-i taanna inuussutissarsiutit siuarsarniarlugit taarsigassarsinermi nammineq aningaasaliissutissaq taamatut tamanut atuuppoq aaqqissuussineq paasiuminarnerusunnortinniarlugu. Tamanna aalisarnermut, piniarnermut nunalerinermullu peqqussutitoqqamut sanilliullugu annikitsuinnarnik allannguuteqartitsineruvoq. Nammineerluni illuliassanut atatillugu allannguteqarpoq nammineerluni akiliutissaq maanna 10 %-iusussaammat, siornatigut 5 %-iulluni.

Allannguummi pineqarpoq qinnuteqartup ilumoorussinerulernissaa. Minnerpaamik akileeataassutissaq 10% minnerpaaffissatut isigisariaqarpoq, tassami nalunaarutikkut nammineq akileeataassutissaq annerusoq piumasarineqarsinnaammat, imm. 4 malillugu.

Imm. 3-mut

Aalajangersakkami siunnersuutigineqarpoq aammaanneqassasoq aalisarnerup nunalerinerullu iluani akileeataassutit aningaasanik allaanerusinnaasut. Naalakkersuisut imminnut pisinnaatippat akileeataassutissat pigisat nalinginit pilersut missingersorlugit nalilersorsinnaasarumallugit pigineqartup nalikillisaanikkut akia nutaaq aallaavigalugu.

Imm. 4-mut.

Naalakkersuisut nalunaarutikkut qinnuteqartup akileeataassutissaata anginerulersinnissaa malittarisassiuussinnaavaat. Tamanna pisinnaavoq inuussutissarsiut pineqartoq ima ingerlalluartigisutut isumaqarfigineqarpat nammineq aningaasaliissutit amerlineqarsinnaallutik.

§ 23-mut.

Imm. 1-imut

Inuussutissarsiutit siuarsarniarlugit taarsigassarsiat akilersornissaat annerpaamik ukiunut tallimanut killilerneqarsinnaavoq. Taamaalilluni periarfissaqarpoq ukiunit tallimanit sivikinnerusumik akilersuisitsineqarsinnaaneranut.

§ 8, imm. 1, nr. 1 aamma 2-mut atatillugu akilersuisitsinissaq ukiunut qulinut aalajangerneqarsinnaavoq angallammik sanaqqiineqarpat iluarsaassineqarlunilu

aamma motoorikkut annertuumik pissarsiniarneqarlunilu taarsiiniarneqarpat. Annertuumik oqalunneq aalajangerneqassaaq aningaasat pineqartut amerlassusiisa aalajangersimasumik nalilerneratigut, qinnuteqartup akiliisinnaassusianik aalisarnerullu pineqartup suuneranik. Malittarisassat maanna atuuttut sivisunerpaamik akilersuisitsinissaq ukiunik qulinik sivisussuseqarsinnaavoq. Peqqussusiatut siunnersuummi erseqqissarneqarpoq akilersuisitsinissami annerpaamik ukiut tallimat aallaaviussasut, kisianni angallammik motoorimilluunniit annertunerusumik iluarsaassinermi akilersuisitsinissaq ukiunik qulinik sivisussuseqarsinnaalluni.

Imm. 2-mut

Inuussutissarsiutinik siuarsaanermut atatillugu taarsigassarsianik akilersuinissamut piffissarititaq sivisunerpaamik ukiunik 20-nik sivisussuseqarsinnaavoq makkununga aningaasaliisoqarsimappat: nunalerinermik siunertaqarluni illuliorneruguni, illunik tigusinerulluni, alliliineqarluni pitsanngorsaalluniluunniit, piginnittoq, atuisoq, aqutsisoq suleqataasorluunniit ataatsimik illuliuunneqarluni, piginnittuusimasoq illuliuunneqarpat illuluunniit taanna tiguarneqarluni, nunaleriffik tiguarneqarpat, innaallagissamut aningaasaajaatinut, illup tunngaviliornerani assassortunut sanaartormullu allanut kiisalu teknikikkut, inatsilerinikkut aningaasaqarnermullu siunnersuineqarsimappat nunalerinermillu siunertalimmik sanaartormut atortunilluunniit pissarsinermut innaalligissiornissaq pillugu, illumut najugaqarfissamut piginnittuusimasulluunniit illusaaq. Taamalu periarfissaqarpoq ukiut akilersuiffissanit ukiunit 20-nit ikinnerusinnaaneranut. Aalajangersakkat periarfissiippat akileeqaarnissap ukiunik marlunnik kinguartinnissaanut, ukiut akilersuiffissat sivisunerpaamik ukiunik marlunnik sivitsorneqarsinnaallutik. Kinguartitsinerit pissuteqarsinnaapput ingerlatsinermi ajornartorsiutinik. Nersutaatit tunngavilernissaannik kissaateqarneq qinnuteqartoq tunngaveqarniarsinnaavoq ukiunilu siullerni savaaqqanik toqoraavallaannginnissani pissutiginiarsinnaallugu.

Aalisarnermut, piniarnermut nunalerinermullu peqqussummi maanna atuuttumi nunalerinermut atatillugu illulianut, tigusinernut allisaanernullu akilersuisitsinissaq ukiunik 25-nik sivisussuseqarpoq. Tamannali sivikillisinneqarpoq ukiunut 20-nut.

Peqqussummi maanna atuuttumi (aalisarnermut, piniarnermut nunalerinermullu) innaallagissat ikkussornerinut aningaasartuutinut nunalerinerlu siunertaralugu illuutigisanut najugarisamullu innaallagissiorneq atortulersuinerluunniit akilersuisitsissutaassaq minnerpaamik ukiuni qulinik sivisussuseqarpoq.

Imm. 3-mut.

Maskiinanik, atortunik, imerterinermut sanaanik, ungalulersuinermut ingerlatsinermilu pisariaqartunut allanut aamma umiatsiaarartaarnermut inunnillu angallassissumut snescooterimut taarsigassarsissutit sivisunerpaamik ukiuni qulini akilersorneqassapput. Taamalu piffissap akilersuiffiusup tamatumani ukiunit qulinit sivikinnerutinnissaanut periarfissaqarpoq.

Tamatumani maannakkut atuuttoq eqqarsaatigalugu allannguuteqartoqanngilaq.

Imm. 4-mut.

Uumasunut kinguaassortitassanut atukkanik akilersuisitsinissaq § 17 malillugu sivisunerpaamik ukiunik 5-nik sivisussuseqarsinnaavoq, taamalu periarfissaqarpoq sivikinnerusmik akilersuisitsinissamut.

Peqqussummi atuuttumi annerpaamik ukiut qulit pineqarput.

Imm. 5-imut.

Pigisanut §§ 13, 14 aamma 16, § 18 malillugu, akilersuisitsinissap assigiinnarpaa inuussutissarsiutit siuarsarniarlugit taarsigassarsitseqqaarnermut atatillugu sivisussusiliineq. Taamaalilluni iluarsaassamut atatillugu taarsigassarsianik qinnuteqaammut pissutaasut akilersorneqarfissaat naleqqiussiffigineqassaaq. Iluarsaanneqartup pigisap akilersorneqarfissaata sinnera sunnerneqassanngilaq.

Qangaanut naleqqiullugu sivisunerpaamik ukiunik 10-nik akilersuitsinissaq atorunnaarpoq. Tamatumani sukaterineqarsimavoq nunalerinerup ingerlaqqinnissaanut iluarsaassinerit maanna pingaaruteqarluinnartussaassallutik nalinginnaasumik ilimagisariaqartutullu iluarsaassinernut aningaasartuutaasartunit annerusimassallutik.

§ 24-mut.

Imm. 1-mut

Aalisarnermik nunalerinermillu inuussutissarsiornerup ilaa inuussutissarsiutit siuarsarniarlugit taarsigassarsiat aqutigalugit aningaasaliiffigisassaq naatsorsuutigineqarpoq allanit naammattumik aningaasaliiffigineqarsinnaassanngitsoq. Naalakkersuisut atukkiigunik ilimagissavaat pineqartumut aningaasaliissutissat kingullit amigaataasut.

Aningaaseriviit piunasaqartarput pigisap taarsigassarsiniarnermut tunulequtaasoq qularnaveeqqusiissutaassasoq.

Namminersorerullutik Oqartussat tamakkiisumik pissarsiassamut aningaasaleeqataaneranni nalinginnaassaaq pigisap aningaasaliiffigeqqullugu inuussutissarsiutit siuarsarniarlugit taarsigassarsissutaaniartoq qularnaveeqqutigineqassasoq 1. prioritetimik. „Sapinngisamik annerpaamik qulakkerineq" taamaalilluni nalinginnaasumik imaalissaaq Namminersorerullutik Oqartussanut qularnaveeqqut salliujunnaassalluni namminersorlutik aningaasaliisut, aningaaseriviunerusut, qularnaveeqqusiinermi salliullutik. Aalajangersakkami siunertaavoq taarsigassarsisup atorniarnermi atugai tamakkiisut eqqarsaatigalugit annerpaamik eqaallisarniarneqassasoq, Namminersorerullutik Oqartussat aningaasaliinissamut sillimmasiinerat annaan-ngikkaluarlugu. Qularnaveeqqusiinermi sallerpaatitaannginnissaq taamaalilluni akuerineqarsinnaavoq.

Allatulli qularnaveeqqusiinissaq aamma piumasarineqarsinnaavoq angallat nunalerinermiluunniit illuutigisap naammattumik sillimasiissutaasinnaanngippata.

Imm. 2-mut

Aalajangersagaq tunngavoq pigisanut allanut tamanut, illuunngitsumut aalisariutaanngitsumullu, aammalu § 24, imm. 1 malillugu eqqarsaatersuutit pineqartut najoqqutarissallugit. Aalajangersagaq taanna malillugu pinngitsoorani qularnaveeqqusiisoqassanngilaq tamanna pisariaqartutut isigineqanngippat.

§ 24-imut atuuppoq, pappiaqqanik nalilinnik naqissusiinermi akitsuut pillugu Inatsisartut inatsisaat atorneqarsassasoq Aalisarnermik, piniarnermik nunalerinermillu inuussutissarsiutillit inuussutissarsiorterannik siuarsaaneq pillugu Inatsisartut peqqussutaannut, pissutigalugu siunnersuutip imarisai Aalisarnermut, piniarnermut nunalerinermullu tapersiisarneq pillugu Inatsisartut peqqussutaannut naapertuummata.

§ 25-mut

Imm. 1-imut

Aalisarnermut, piniarnermut nunalerinermullu tapersiisarneq pillugu Inatsisartut peqqussutaanni § 18-imut sanilliullugu allannguuteqanngilaq. Naalakkersuisut erniaqartitsineq inuussutissarsiutillu siuarsarniarlugit taarsigassarsiat taarsersorneqarnissaat pillugit malittarisassanik aalajangersaasarput. Inuussutissarsiutit siuarsarniarlugit taarsigassarsiat naafferarlugit akilerneqarsinnaapput, assersuutigalugu suliat immikkoortuisa naammassineranni akiligassat allagartaat tiguneqartarnerat malillugu.

Imm. 2-mut

Inuussutissarsiutit siuarsarniarlugit taarsigassarsiat utertillugit tamaasa akilerneqarnissaat imatut pisoqartillugu Naalakkersuisut piumasarisinnaavaat:

Erniat utertitsillunilu akiliutit kingusinnerpaamik ulloq akiliiffissaq eqqortoq kingulleq akilerneqarsimanngippata. Piumasaqaataavorli inuussutissarsitit siuarsarniarlugit taarsigassarsiat tamaasa utertillugit akileqquneqarsinnaasut taarsigassarsisup erniat utertitsillunilu akiliutit tamanna pillugu piumasaqaatip nassiunneqareernerata saqqummiunneqareerneratalu kingorna kingusinnerpaamik ullut arfineq marluk qaangiunneranni. Naalakkersuisut piumasaqaataat ullup akiliiffissap eqqortup kingorna saqqummiunneqassaaq, erseqqissumillu oqaatigineqassalluni inuussutissarsiutit siuarsarniarlugit taarsigassarsiat tamaasa utertillugit akilerneqarnissaat piumasaqaataasinnaasoq, piffissarititap qaangiutereerneratigut erniat utertitsillunilu akiliutit akilerneqarsimanngippata. Tamatuma saniatigut taarsigassarsiat uterteqquneqarsinnaapput atukkiussinermi atugassarititaasut sumiginnarneqarsimanerat najoqqutaralugu, soorlu taarsigassarsisup tatiginartumik pissutsit attuumassuteqartut oqaatigisinnaanngippagit qanorpiaq pisimasut peqqussutip § 30, imm. 2-mi allassimasutut. Taamaalilluni inuussutissarsiutinik siuarsaanermut atatillugu taarsigassarsisitsinermi obligationeqarnermi malittarisassat nalinginnaasut malinniarneqarput.

Imm. 3-mut

Aalajangersakkami aalajangersarneqarpoq piffissami akilersuiffissami eqqorlugu qaqugukkut akiliisoqarneraq. Taamaalilluni piffissami akilersuiffissami ullup akiliiffissap kingorna kingusinnerpaamik ullut 30-t qaangiunnerani eqqortumik akiliineruvoq. Piffissaq akilersuiffissaq qaangersimagaanni, tamanna inuussutissarsiutit siuarsarniarlugit taarsigassarsianik sumiginnaanermik isigineqassaaq.

Imm. 4-mut

Aalajangersagaq malillugu Naalakkersuisut piffissamik akiliiffissamik kinguartitsinnaanermik nalunaaruteqarsinnaapput. Kinguartitsinissamik akuersisoqaraangat sumiginnaasoqarneq ajorpoq, tassa inuussutissarsiutit siuarsarniarlugit taarsigassarsiat utertillugit akilersorneqarnissaanni piumasaqaatit allanngortinnissaat Naalakkersuisut akuerinikummassuk.

Sivisunerpaamik ukiuni marlunni kinguartitsinissamik akuersissuteqartoqarsinnaavoq.

Piffissami akilersuiffissami akiliinissap kinguartinneqarnissaanut piumasaqaatit tassaapput, inuussutissarsiutit siuarsarniarlugit taarsigassarsiat 60%-ii sinnerlugit qularnaveeqquteqarnerat, Naalakkersuisullu naliliissasut akiliisinnaassuseqannginneq piffissami killilimmi atuuttoq.

"Piffissami killilimmi atuuttoq" isumaqarpoq aallaaviusumik piffissaq akilersuiffik ataaseq, ukiunillu marlunnik sivisunerussanani.

Imm. 5-imut

Imm. 4 malillugu piffissami aalajangersimasumi piffissami akilersuiffimmi akiliinissap kinguartinneqarnissaa Naalakkersuisut akuerisimappassuk inuussutissarsiutit siuarsarniarlugit taarsigassarsiat piffissap pineqartup sivisoqataamik akilersorneqarnissaat sivitsorneqassapput, taarsigassarsisup piffissanut akilersuiffinnut akiliisarnini nangippagu. Taarsigassarsisup piffissami akilersuiffimmi ataatsimi akiliinissaata kinguartitsinissaa akuerineqarsimappat, piffissat akilersuiffissat sinneruttut piffissamik akilersuiffissamik ataatsimik sivitsorneqassapput.

Imm. 6-imut

Immikkut pisoqartillugu piffissani akilersuiffissani akiliinissat ukiut marluk sinnerlugit kinguartinnissaannik Naalakkersuisut akuersissuteqarsinnaapput. Oqaatsimi immikkut pisoqartillugu pineqarput napparsimaneq, silap pissusaa inuussutissarsiornermilu akornutit immikkut ittut allat. Assersuutit taaneqartut tamakkiisuunngillat.

Aalajangersakkap atuuffissaatut eqqarsaatigineqartut tassaapput qulaani taaneqartutut immikkut pisut, pissutsinut aalajangersimasunut imaluunniit tamanut atuuttunut tunngassuteqartut.

Oqaaseq "napparsimaneq" isumaqarpoq, sivilunerusumi napparsimaneq taarsigassarsisup inuussutissarsiorneranut sunniisoq.

Kinguartitsinissamik periarfissaqarnermut tunngaviuvoq, piffissami killilimmi akiliinissap ajornartorsiutaalernissaa. Ukiut marluk qaangiutereerneranni, pisunilu immikkut ittuni ukiut marluk sinnerlugit, taarsigassarsisoq akiliisinnaassuseqaqqilinngippat nalilersortariaqarpoq inuussutissarsiutit siuarsarniarlugit taarsigassarsianik isumaqatigiissutigineqartutut utertitsilluni akiliisinnaassuseqarnerasoq, taassumalu kingorna inuussutissarsiutit siuarsarniarlugit taarsigassarsiat taamaatinneqarlutik qularnaveeqqusiineqarsimappallu qularnaveeqqutigineqartorlu tiguneqarluni, takuuk § 25, imm. 2.

Siunertaavoq aalajangersagaq taamaallaat inuussutissarsiutit siuarsarniarlugit taarsigassarsianut atuutissasoq piffissami akilersuiffimmi akiliinissap kinguartinneqarnissaanik qinnuteqartoqarsimatillugu, inuussutissarsiutinullu taarsigassarsisitsinermi aamma ESU-mi taarsigassarsianut allanut atuutissanani. Akiligassat kinguaattooritit allat akilernissaannut kinguartitsineq taamaallaat pisinnaavoq inuussutissarsiutinut tapersiisarnermit taarsigassarsiat nuunnerisigut, takuuk siunnersuummi § 28.

§ 26-mut

Imm. 1-imut

Aalajangersagaq aalisarnermut, piniarnermut nunalerinermullu tapersiisarneq pillugu Inatsisartut peqqussutaanni nr. 10 12. november 2004-meersumi § 27-mik piuinarsaaneruvoq. Malittarisassat atuuttut malillugit ernialiisarnerup unitsinneqarnera qularnaveeqqussutaasup inissisimaneranut atavoq. Aalajangersagassatut nutaatut siunnersuutigineqartumi Naalakkersuisut tungaanniit taarsigassarsiat taamaatinneqarnerannut piffissaq pingaaruteqarpoq. Tassaniippoq taamaatitsinermi qularnaveeqqusiisoqarsimappat qularnaveeqqutaasorlu naleqarpat Naalakkersuisut tigussagaat. Taarsigassarsiat ikilisinnissaannut ukiumoortumik tapersiisarnermik aalajangersagaq Inatsisartut peqqussutaannik atuuttumik ingerlatitseqqiineruvoq.

Inuussutissarsiutit siuarsarniarlugit taarsigassarsiat ikilisinnissaannut tapiissuffigineqarnissamik taarsigassarsisoq inatsisit tunngavigalugit piumasaqarsinnaanngilaq. Atornerluisinnaaneq pinngitsoorniarlugu tamanna ilanngunneqarpoq. Periuserli tasaanikuuvoq taarsigassarsiat sumiginnakkat sukkanerusumik taarsersornissaannut Naalakkersuisut tamanut atuuttumik tapiissuteqartarnerat. Periutsip taassuma allanngortinnissaa siunnersuutaanngilaq, taamaallaalli atornerluisinnaanerit pinngitsoortinniarnearlutik.

Imm. 2-mut

Ukiumoortumik tapiissutit taarsigassarsisullu ukiumoortumik akiliutai qaammatinut aqqaneq marlunnut siuliiniittunut sanilliullugu naatsorsorneqassaaq. Qaammatit taakku 12-t naatsorsorneqassapput inuussutissarsiutit siuarsarniarlugit taarsigassarsianik Naalakkersuisut ulloq taamaatitiffianniit.

Aalajangersagaq imatut paasineqassaaq Naalakkersuisut tapiissuteqartartut inuussutissarsiutinut tapersiisarnermit taarsigassarsiat ulloq taamaatinneqarfiisa kingorna taarsigassarsisup akiliutigisartagaasa amerlaqataannik.

Aalajangersakkamut atatillugu eqqarsaatigineqarsimavoq taarsigassarsiat sumiginnaaffiginissaannut kajumissaatissanik takusassaqaassanngitsoq § 21-mi taaneqartunit pilerinarnerusunik taarsigassarsiat akilersornissaannut oqilisaataasinnaanerusunik. Maannamut ulluinnarni atugaasutut erseqqissareermat ingerlataq taarsigassarsisitsinermit tunulequtaasoq sumiginnarneqaruni annaaneqassasoq taamalu isertitaqartarnermut tunngaviusoq peerulluni sumiginnaanissamut kajumissaatissaq aamma peerneqarsimassasoq naatsorsuutigisariaqarpoq. Taamaakkaluaq tapissutissat amerlassusilerneqarsinnaassapput aalajangersakkap matuma § 21, imm. 2-anit pitsaanerusunik nassaarsiorani.

§ 27-mut

Imm. 1-imut

Isumakkeerinninnissamut periarfissat allanngungaarnissaat siunnersuutigineqanngilaq. Kisiannili ukioqassuseq utoqqalinersiaqarnermilu pissutsit kingunerinik isumakkeerinninnissamut periarfissap ingerlateqqinneqannginnissaa siunnersuutaavoq. Tamanna tunngaveqarpoq taanna inuussutissarsiutinut tapersiisarnermi aningaasat atorerlunneqarsinnaanerinut periarfissiisnaammat. Taamaalilluni aalisartoq 60-it sinnerlugit ukioqalereersimasoq malittarisassat maannakkut atuuttut malillugit aalisariut akikinnerusumik tunisinnaavaa, assersuutigalugu ilaqtaminut, tassa taarsigassarsiaminik sinneruttunik isumakkeerfigineqarnissani qulakkeersinnaagamiuk. Kisiannili malittarisassat maannakkut atuuttut malillugit piumasaqaataavoq Naalakkersuisut qularnaveeqqusiiffigineqartup tunineqarnerani akigitinniarneqartumik akuersissasut. Taarsigassarsisoq taarsigassarpassuaqarpat, taanna isumakkeerfigineqarsinnaavoq aalajangersakkami uani malittarisassat allat malillugit. Taamaatitsinermi ernialiisarneq unitsinneqassaq, siunnersuut § 26 malillugu.

Imm. 2-mut

Oqaaseq ukiut qaninnerit isumaqarpoq ukiut marluk pingasulluunniit.

Taarsigassarsisup inuussutissarsiutinut tapersiisarnermit taarsigassarsiaminik ukiuni qaninnerni akilersuisinnaanermut periarfissaqarnera, imm. 3-mi pissutsit tunngavigalugit nalilersorneqassaaq.

Imm. 3-mut

Taarsigassarsisup akiliinissamut periarfissaqarnera nalilersorniarlugu taarsigassarsiat amerlassusaat taarsigassarsisup inoqtigisaasalu pigisaannut nalilinnut sanilliullugit nalilersorneqassapput, taassuma ataani ileqqaakkanik, taarsigassarsiaasa saniatigut pigisat nalinginik taarsigassarsisullu pigisaanik nalilinnik allanik nalilersuineq. Taarsigassarsisup ilinniagaqarnera suliffissaqarnermullu periarfissai allat

tungavigalugit nalilersuisoqassaaq, taarsigassarsisoq taarsigassarsiat utertillugit akilernissaannut atugassanik isertitaqarsinnaanersoq. Taarsigassarsisup qanoq utoqqaatiginera siunissami suliffeqarsinnaaneranut periarfissaqarnerata nalilersorneqarneranut ilaatinneqarsinnaavoq. § 27, imm.1-imi oqaaseqaatit innersuussutigineqarput, tassani inunnut 60-it sinnerlugit ukiulinnut taarsigassarsiaminik ingerlaannartumik isumakkeerinnissinnaaneq atorunnaarpoq.

Imm. 4-mut

Aalajangersagaq imatut paasineqassaaq taarsigassarsisoq sapinngisani malillugu taarsigassarsiaminik taarsersuisoq ukiut qulit qaangiunneranni taarsigassaminik tamakkiisumik isumakkeerfigineqarsinnaasoq. Piumasaqaataavoq nalilerneqassasoq taarsigassarsisup akiliisarnini ingerlatiinnassagaa. Nalilersuinermi tungavigineqassaaq akilersuineq taarsigassarsisumut qanoq nanertuutaatiginersoq.

Imm. 5-imut

Inuit kisimik suliffeqarfiit pinnagit Naalakkersuisut taarsigassarsiaannik isumakkeerinniffigisinnaavaat.

§ 28-mut

Inuussutissarsiutinut tapersiisarnermit taarsigassarsiat nuunneqarnissaannut aalajangersagaq periarfissiivoq, aamma siusinnerusukkut taarsigassarsiaasimasunut. Piumasaqaataavorli inuussutissarsiutit siuarsarniarlugit taarsigassarsiat ukiut 5-it sinnerlugit ingerlasimanissaat, tassa Aalisarnermut, piniarnermut nunalerinermullu tapersiisarneq pillugu Inatsisartut peqqussutaat malillugu inuussutissarsiutinut tapersiisarnermit taarsigassarsiat siunnersuut una malillugu ajornartorsiuteqarani sivikinnerpaamik ukiuni 5-imi taarsersorneqarnissaat ilimagalugu taarsigassarsiissutigineqartassammata.

Malittarisassanut maannakkut atuuttunut tungatillugu siusinnerusukkut erseqqissarneqarnikuvoq inuussutissarsiutit siuarsarniarlugit taarsigassarsiat tamassuma kingorna isumaqatigiissutigineqartutut utertillugit akilerneqartassasut ilimagineqartariaqartoq.

Inuussutissarsiutit siuarsarniarlugit taarsigassarsinermi pigisat nalillit qularnaveequtigineqartut inuussutissarsiutit siuarsarniarlugit taarsigassarsiat nuunneqarneranni annaaneqartassanngillat.

§ 29-mut

Inuussutissarsiutit siuarsarniarlugit taarsigassarsianut atuutereersunut akiligassallit nikissinnaapput, taarsigassarsisoq nutaaq inuussutissarsiutit siuarsarniarlugit tapersiisarnermit taarsigassarsinissamut piumasaqaatit eqqortippagit.

Aalajangersakkami taamaallaat aalajangersarneqarpoq akiligassallit nikinneranni taarsigassarsisitsisup taarsigassarsisumut pisinnaatitaaffii nalinginnaasut malillugit

atuutinneqassasut. Tamanna imatut isumaqarpoq taarsigassarsisoq nutaaq isumaqatigiissummi pisinnaatitaaffinnik pisussaatitaaffinnillu tamanik tigusissasoq. Isumaqatigiisstit taamaallaat allanngortinneqarsinnaapput Naalakkersuisut akuersippata.

§ 30-mut

Imm. 1-imut

§ 30, malillugu inuussutissarsiutit siuarsarniarlugit taarsigassarsiat taamaatinneqarnissaannik Naalakkersuisut aalajangiisinnaapput, taarsigassarsissutigineqartut tapiissutigineqartulluunniit paasissutissat eqqunngitsut tunngavigalugit tunniunneqarsimappata. Inuussutissarsiutit siuarsarniarlugit taarsigassarsiat taamaatinneqarpata inuussutissarsiutinut tapersiisarnemit taarsigassarsiat ingerlaannaq utertillugit akilerneqassapput.

§§ 11 aamma 25 imm. 2 malillugit taarsigassarsiat Naalakkersuisunit atorunnaarsinneqarsinnaapput obligationinut aalajangersakkat tunngaviusut nalinginnaasut najoqqutaralugit. Aalajangersakkami aamma oqaatigineqarpoq Naalakkersuisut tapiissutit uterteqqusinnaagaat § 11-mi taaneqartut najoqqutaralugit. Tapiissutit uterteqquneqarsinnaapput inuussutissarsiutigalugu umiatsiaararisamut piumasareqqaakkat naammassisinnaanngippata, tassa imaappoq inuussutissarsiutigalugu piniarnermut inuussutissarsiutigaluguluunniit aalisarnermut inuussutissarsiutissatut aamma umiatsiaaraq annerusumik inuuniutigalugu nalunaarsorsimanera eqquutitinneqarsimanngippata. Aamma taarsigassarsisimaneq atorunnaarsinneqarsinnaavoq § 5, imm. 1 malillugu pisiarisimasat tunineqarsimappata qularnaveeqqusiunneqarsimappataluunniit. Aalajangersagaq § 11 nr. 6-imiittoq periarfissiivoq tapiissutit uterteqqunissaannut § 11 nr. 5 malillugu tuniniaasimanerup uppernarsarneqarnissaanit allaasumik pissuteqartoqarsimappat atugassarititaasut piumasarisallu tapiinermut tunngasut eqquutitinneqannginneranni. Nunagissaanerit aamma § 11 nr. 6-miipput.

Pisortanut taarsigassarsiat kinguaattooritit akilersinniarnissaat pinngitsoortitsiniarnerlu pillugit Inatsisartut inatsisaat pisassanut aalisarnermik, piniarnermik nunalerinermillu inuussutissarsiutillit inuussutissarsiornerannik siursaaneq pillugu Inatsisartut peqqussutaat malillugu pinngortunut atuuppoq, tassa siunnersuutip imarisamigut aalisarnermut, piniarnermut nunalerinermullu tapersiisarneq pillugu Inatsisartut peqqussutaat assigissammagu.

Naalakkersuisut naliliippata eqqunngitsunik paasissutissiisoqarsimasoq pasissutiissutigineqartut eqqortuunersut Naalakkersuisut misissussavaat.

Imm. 2-mut

Inuit suliffeqarfiiilluunniit inuussutissarsiutinut tapersiisarnemit taarsigassarsianik tapiissutinilluunniit pissarsisut aningaasaqarnerminni pissutsinik Naalakkersuisunut paasissutissiisussaatitaapput. Paasissutissiisussaatitaaneq paasissutissanut Naalakkersuisut pigeriigaannut allannguutininut taamaallaat atuuppoq. Oqaatsimi annertuumik allannguutit pineqarput allannguutit inuussutissarsiutit siuarsarniarlugit

taarsigassarsianik utertitsilluni akiliisinnaanermut periarfissanut sunniuteqartut. Pissutsinut taarsigassarsisitsinermit tapiinermulluunniit pingaaruteqartunut uppersaatinik taarsigassarsisup nassitsinissaanik Naalakkersuisut piunasaqaateqarfigisinnaavaat.

Oqaatsimi aningaasatigut pineqarpoq inuussutissarsiornermi suliffeqarnermiluunniit pissutsit, assersuutigalugu inuussutissarsiummik ingerlataqarunnaarnej, suliffeqarfiillu eqqarsaatigalugit assersuutigalugu piginnittuni pissutsit allangornerat.

Utertitsilluni akiliisitsinnaaneq pisortanut taarsigassarsianik kinguaattoorutit akilersinniarneqarnissaat pinngitsoortitsiniarnerlu pillugit Inatsisartut inatsisaanni malittarisassat malillugit.

Imm. 3-mut

Aalajangersakkami Naalakkersuisut misissuinissamut periarfissinneqarput, tassa piunasaqaateqartoqarneratigut inuussutissarsiornermi umiatsiaaraq atorlugu aningaasat isertitat uppersaataat nassiunneqartussaammat. Misissuinermit uppersarneqarsinnaavoq umiatsiaaqqamut tapiinermi piunasaqaatit malinneqarnersut. Siunnersuutigineqarpoq misissuinissamut periarfissat taakku ilanngunneqassasut tapersiinermit aningaasat tapiissutiviusut eqqortumik atorneqarnissaannik ilimagisaqarnissaq annertusarniarlugu.

Uppersaatit tassaasinnaapput pisanik tunisinermi allagartat, pisinermit uppersaatit, akiligassat allagartaat imaluunniit skattekorti.

§ 31-mut

Siunnersuutigineqarpoq Naalakkersuisut annertunerusunik malittarisassiornissaannut annertuumik pisinnaatinneqassasut, tamannalu eqaatsumik periuseqarsinnaanermik kissaateqarnermik tunngaveqarpoq. Naalakkersuisut taamaalillutik qaqugukkulluunniit inuussutissarsiutini pingaarnerni ineriartornerit, ineriartornerup siuarsarneqarnissaanik kigaallatsinnissaannilluunniit Naalakkersuisut soqutigisaqartillugit, killilersornissaanut periarfissaqassapput.

Nr. 1-imut

Inuussutissarsiutini immikkoortut imaluunniit suliniutit immikkoortut aalajangersimasut siuarsarneqarnissaat Naalakkersuisut kissaatigippassuk, tamanna nalunaarusiornikkut pisinnaavoq.

Nr. 2-mut

Nunap immikkoortuani aalajangersimasumi ineriartornerup siuarsarneqarnissaa Naalakkersuisut kissaatigippassuk, peqqussut una malillugu immikkoortut aalajangersimasut annertunerusunik siuarsarniarneqarpata imaluunniit inuussutissarsiutinut tapersiisarnermi taarsigassarsisinnaanermut tapiissutisisinnaanerluunniit periarfissat killilerniarneqarpata.

Nr. 3-mut

Inuussutissarsiutit siuarsarniarlugit taarsigassarsiat akilersorneqarneranni tapiissutit pillugit Naalakkersuisut malittarisassanik aalajangersaasinnaapput, taassuma ataani tapiissutit annertussusissaat tapiissutinillu pissarsiniaranni piumasaqaatit suut naammassineqarsimassanersut.

Nr. 4-mut

Qinnuteqartup ilinniagaqarsimanissaanik piumasaqaatit pillugit Naalakkersuisut malittarisassanik aalajangersaasinnaapput. Aammattaaq suliniutit pineqartut piviusunngortinneqarsinnaaneriniq qulakkeerinninnissamut pisariaqartut naliliisoqartillugu aningaasatigut teknikkikkullu piumasaqaateqartoqarsinnaavoq,

Nr. 1-imut atatillugu oqaatsit aalisartut piniartullu qanoq paasineqarnerinik allannguinnissat pillugit Naalakkersuisut malittarisassanik aalajangersaasinnaapput, allannguinerillu taakku peqqussut una malillugu inuussutissarsiutit siuarsarniarlugit taarsigassarsianut tapiissutinullu sunniuteqassanersut. Aammattaaq Naalakkersuisut malittarisassanik aalajangersaasinnaapput aalisartut, piniartut nunalerisullu ilinniarteqqinnissaannut, allamik inuussutissarsiutitaarnissaalluunniit siunertaralugu.

Nr. 5-imut

Nunagissaanermi sulianut tapiissutit annertussusissaat pillugit Naalakkersuisut malittarisassanik aalajangersaasinnaapput, taassuma ataani nunagissaanermi nunaatillip sulinermigut akileeqaataassutai maskiinat il.il. atornerisigut. Taassuma ataani sulinikkut, maskinanik il.il. tapiissutit qanoq nalilersorneqassanersut. Aammattaaq nunap annertussusissaa, suliap suunissaa nunap assersuutigalugu ujaqaassutsikkut nunallu pitsaassutsimigut qanoq ittuunissaa pillugit Naalakkersuisut malittarisassanik aalajangersaasinnaapput.

Nr. 6-imut

Ingerlatsinermit akiligassarsiat ernialersornissaat, ingerlatsinermit akiligassarsiat annertussusissaat, ingerlatsinermit akiligassarsiat utertillugit akilersorneqarnerissaat, aningaasartuutit ingerlatsinermit akiligassarsianut ilaasut aammalu ingerlatsinermit akiligassarsiat tunniunneqarneranni uppersaatit pisariaqartut pillugit Naalakkersuisut malittarisassanik aalajangersaasinnaapput.

Nr. 7-imut

Peqqussut una malillugu allaffissornikkut ingerlatsinermit aamma peqqussummik malinninnissamut kommuninut piumasaqaatit pillugit Naalakkersuisut malittarisassanik aalajangersaasinnaapput.

§ 32-mut

Siunnersuutigineqarpoq Inatsisartut peqqussutaat una 1. januar 2007-imi atuutilissasoq.

Peqqussutip atuutilernerani Aalisarnermut, piniarnermut nunalerinermullu tapersiisarneq pillugu Inatsisartut peqqussutaat nr. 10 12. november 2001-imeersoq atorunnaassaaq.

Inuussutissarsiutinut tapersiisarneq pillugu Namminersornerullutik Oqartussat nalunaarutaat nr. 12 12. december 1984-imeersoq atuutiinnassaaq, peqqussummi uani Inatsisartullu peqqussutaanni allani pisinnaatitsineq malillugu malittarisassatut aalajangersakkat malillugit taarserneqarnissaata atorunnaarsinneqarnissaataluunniit tungaanut.

Inuussutissarsiutinut tapersiisarneq pillugu Inatsisartut peqqussutaat nr. 4 20. november 1984-imeersoq aamma aalisarnermut, piniarnermut nunalerinermullu tapersiisarneq pillugu Inatsisartut peqqussutaat nr. 10 12. november 2001-imeersoq malillugu aningaasat pisassat killilersorneqarput piffissami pisassarisat pilersinneqarneranni malittarisassat atuuttut malillugit.